

四庫全書

史部

欽定四庫全書總目卷七十六

史部三十二

地理類存目五

龍虎山志三卷

兩淮馬裕家藏本

元元明善撰明張國祥續修明善字復初清河人以浙東使者薦爲學正擢太子文學厯翰林學士謚文敏事蹟具元史本傳國祥則嗣封真人也是書乃皇慶三年明善官翰林學士時奉勅所修然原本體例不可復考惟存延祐元年程鉅夫序及

吳全節進表此本載山川建置人物道侶並累朝制勅藝文頗爲龐雜殆已多所竄亂非其舊矣

茅山志十五卷

浙江孫仰曾家藏本

元道士劉大彬撰大彬號玉虛子錢塘人延祐中襲封茅山四十五代宗師洞觀微妙元應真人是書分誥副墨三神紀括神區稽古蹟道山冊上清品仙曹署采真游樓觀部靈植檢錄金石金薤編十二門每門以三字爲題蓋仿陶宏景真誥例也前有永樂癸卯胡儼序稱舊本爲張雨所書至爲

精潔後燬於兵姚廣孝復爲刊板及成化庚寅嘉
靖庚戌又重刻者再此本卽嘉靖時刻不但紙板
惡劣非張雨之舊且爲無識道流續入明事叙述
凡鄙亦非劉大彬之舊矣

仙都志二卷

兩淮馬裕
家藏本

元道士陳性定撰仙都山古名縉雲山唐天寶中
勅改今名此志分六門曰山川曰祠宇曰神仙曰
高士曰草木曰碑碣題咏前序題至正戊子不著
姓名以序及志中祠宇門考之蓋元延祐中給道

士趙嗣祺五品印提點是山玉虛宮羽流榮之因
撰是志也

天台山志一卷

兩淮鹽政
採進本

不著撰人名氏末稱世祖皇帝封道士王中立爲
仁靖純素真人知爲元人所作又稱前至元間知
爲順帝時人矣其書頗典雅可觀然七十二福地
一條不引杜光庭書而引記纂淵海知爲稗販之
學矣

武夷山志十九卷

江蘇巡撫
採進本

明裘仲孺撰仲孺字穉生崇安人洪武初薦授平遠縣知縣其書凡十一篇首名勝次雲構次題刻次仙真次羽流次存疑次物產次游寓次祀典次揆藻次餘韻末一卷爲詞訂則詩文之續得者也體例麗雜殊不足觀揆藻一篇幾及全書之半尤失裁制也

震澤編八卷

浙江巡撫採進本

明蔡昇撰王鏊重修昇字景東吳江人鏊有史餘已著錄是書首紀五湖七十二山兩洞庭次石泉

古跡次風俗人物土產賦稅次水利官署寺觀菴
廟雜記次集詩集文前有宏治十八年楊循吉序
稱其操觚之妙天機獨運中間有似爾雅者有似
山海經者有似柳子厚諸山水記者用能繪畫造
物陳諸簡牘未免譽過其實昇書本名太湖志鰲
爲重修乃取禹貢之語改今名云

金山襟志一卷

浙江汪汝璫家藏本

明楊循吉撰循吉有蘇州府纂修識畧已著錄金
山在吳縣西三十里循吉少時嘗讀書其中歸田

後因爲之志分八篇一山勢二品石三泉四山居
五游觀六草木七飲食八勝事每篇各有論贊

雁山志四卷

浙江汪啟淑家藏本

明朱諫撰諫號蕩南樂清人宏治丙辰進士官至
吉安府知府雁蕩山在温州府跨樂清平陽二縣
於古無稱自宋太平興國中始有僧居之奇秀甲
於浙東明初僧永昇者始輯爲雁山集一卷編次
無法嘉靖己亥諫因舊本搜討增爲四卷列三十
二門樂清知縣徽州潘潢序之萬曆辛巳知州南

昌胡汝寧復爲翻雕而以續得詩文冠於卷前殊
爲猥雜

京口三山志十卷

江蘇巡撫
採進本

明張萊撰萊字廷心丹徒人宏治間舉人北固金
焦三山皆古來勝境而未有哀輯遺文舊事合爲
志者兗州史宗道爲鎮江推官始屬萊考三山名
蹟沿革及歷代詩文彙成此編頗能正訛訂譌如
金山之名舊云創於唐李錡萊則謂梁天監四年
卽金山修水陸會其名已始於六朝考證頗爲典

核然如事物紀原引宋大中祥符七年四月詔封
焦山大聖祠爲明應公本非僻書僻事而祠廟類
中乃失收之則疎密亦不免互見蓋萊所依据多
取諸郡縣圖經未能博徵羣籍故每有漏畧也

慧山記三卷

浙江范懋柱家
天一閣藏本

一名九龍山記明邵寶撰寶有左鱗已著錄慧山
卽惠山在無錫縣界局狹而氣秀地近而景幽自
昔號爲佳境寶居近是山釣遊所及時有品題所
作如惠山雜歌惠山十二詠敘竹茶鑪文等篇具

載於容春堂續集中此書仿賀知章會稽洞郭之
美羅浮山之例搜輯舊事遺文爲之作志

鄧尉山志一卷

浙江范懋柱家
天一閣藏本

明沈津撰津字潤卿蘇州人是書分本志泉石祠
墓苑宇山居名釋草木食品集詩集文十類前爲
總敘一篇其稱本志者以專紀山之形勢爲作志
本意故以冠於各類之首也書成於嘉靖壬寅浙
學顏嘗爲之序黃虞稷千頃堂書目遂以爲學顏
所作失考甚矣

衡嶽志十三卷

浙江汪啟淑家藏本

明彭簪撰姚宏謨重訂考明史藝文志載彭簪衡嶽志八卷此多五卷當卽宏謨所增然宏謨序已稱續刻者隨時竄入而不之究則未經重修以前已非簪之原本矣序又稱總形勝於多景之前補事紀於諸卷之首此本一卷爲事紀二卷三卷爲形勢知爲宏謨所增至所稱詩文以景附景以類分者則散綴各卷不可復考簪自號石屋山人安城人官衡山縣知縣其書成於嘉靖戊子宏謨秀

水人嘉靖癸丑進士官至吏部左侍郎其書成於
隆慶辛未時提督湖廣學政應知縣章宣之請續

此編云

廬山紀事十二卷

浙江汪汝璩家藏本

明桑喬撰

國朝范祜補訂喬字子木江都人嘉靖壬辰進士官
至監察御史以首劾嚴嵩爲所構陷謫戍九江以
卒事迹具明史本傳此書卽其謫戍時作成於嘉
靖辛酉至

國朝順治戊戌巡按御史許世昌屬南康推官會稽
范祜重爲補訂以山陰山陽別其條貫屬南康者
列於陽屬九江者列於陰又取喬後百餘年間事
跡題詠綴補於後祜序稱喬書質而辨文而約紀
事皆題原採書名祜所補悉仿其例云

仙都山志二卷

兩淮馬裕
家藏本

明戴葵撰葵鄧都人始末未詳據其自跋此書蓋
嘉靖丁未作也仙都山在四川鄧都縣境爲道經
第四十二福地稱前漢王方平後漢陰長生得道

處葵襍采舊文分爲八類大抵神仙家言爲多

牛首山志二卷

兩淮馬裕
家藏本

明盛時泰撰時泰字仲交江寧人嘉靖中貢生牛首山在江寧城南一名天闕是書首志山名次志巖洞池泉殿廬草樹法寶遊覽麗藻其文頗近遊記不盡沿志書窠曰其藝文多著出某書亦明人所難惟地畝弓口一條全錄稟帖批詞首尾不加刪削殊失體例

仙巖志六卷

兩淮馬裕
家藏本

明王應辰撰應辰自署曰舉人不著里貫考太學
題名碑有隆慶辛未進士王應辰信陽人去作此
書時僅十六年未知卽其人否也仙巖山在浙江
瑞安縣境爲道書第二十六福地嘉靖壬戌兵部
郎中永嘉王叔果屬應辰爲此編首載圖景次錄
詩文序次尙頗簡潔

黃海六十卷

兩江總督
採進本

明潘之恒撰之恒字景昇歙縣人嘉靖間官中書
舍人考明史藝文志有潘之恒黃海二十九卷此

本雖未標卷數其曰紀初者八曰紀藏者七曰紀跡者十有八曰紀遊者二十有一曰紀異者六皆別之爲卷則已六十卷矣史稱二十九卷未爲確數然其中次第卷數或有或闕或參差錯互蓋猶未定之稿不知其止此六十卷否也黃山在徽州府西北百三十里舊名黟山唐改今名跨據宣池江浙數郡世傳黃帝與容成子浮邱公煉藥於此故有浮邱容成諸峯此姑存圖經之說以備古迹一條則可之恒竟上溯軒轅采摭經傳凡涉黃帝

者皆入焉至以廣黃帝本行紀真仙通鑑諸書與
六經之文並列何其誕歟大抵以多爲勝而考證
之學與著述之體則非所講也

武夷山志畧四卷

浙江范懋桂家
天一閣藏本

明徐表然撰表然字德望崇安人嘉靖中嘗結漱
藝山房於武夷第三曲因撰次是書分爲四集繪
山之全圖及武夷宮左各景宮右九曲諸勝悉以
題詠附於後凡名勝古跡皆分附於山川較他地
志尤便省覽此變例之可取者至於寓賢及仙真

之類人繪一圖則不免近兒戲矣其名志畧者謂
茲山已有全志也

阿育王山志十卷

兩淮馬裕
家藏本

明郭子章撰子章有蠙衣生易解已著錄阿育王
山在浙江寧波府去府治四十里山有阿育王寺
舍利塔相傳爲地中涌出因以名寺遂因以名山
蓋緇流梵笈有是異聞年祀綿遠亦無從而究詰
也是志凡分十類揆其大旨主於闡釋氏之顯應
故標茲靈迹以啟彼信心原不以核訂地理考證

古今爲事也

雲門志畧五卷

浙江巡撫採進本

明張元忭撰元忭有紹興府志已著錄雲門山在會稽城南元至正十年相里允若作雲門集黃潛序之元忭以其未備補緝是編以山川古蹟名賢爲一卷而餘四卷皆藝文又末大於本矣

京口三山續志四卷

浙江巡撫採進本

明徐邦佐陳朝用朱文山同撰邦佐號雁洲浦城人官鎮江府教授朝用號南湖寧都人文山號仰

泉常寧人皆官鎮江府訓導是書成於隆慶中以
補史宗道三山志之闕故以續志爲名專取當時
人遊覽詩賦彙萃成帙而邦佐等所自作附錄尤
夥名曰地志實同社稿於三山考訂無涉也

齊雲山志五卷

浙江汪啟淑家藏本

明魯點撰點字子與南漳人萬歷癸未進士官休
寧縣知縣齊雲巖在休寧縣蓋白嶽西北之分支
也上有北極佑聖真君神祠明代數經修輯至嘉
靖中始別名曰齊雲山茲志因舊本而重輯分三

十七目卷前又有順治中告示一通又後人列入
非原書之舊矣

普陀山志六卷

兩淮馬裕
家藏本

明周應賓撰應賓有九經考已著錄普陀山在浙
江之定海是編因舊志重輯凡六卷十五門而應
賓自序稱五卷十七門勘驗卷帙並無闕佚未審
何以矛盾也

太岳太和山志十七卷

江蘇巡撫
採進本

明田玉撰玉不知何許人萬曆中宦官也太和山

卽湖廣均州之武當山相傳爲北極元武修真地
明成祖卽位時自謂得神之祐因尊爲太岳勅建
宮觀常遣內臣司其香火嘉靖間提督太監王佐
始剏爲志太監呂評續增之萬厯癸未玉復增廣
爲此本前載修建廟宇始末事實並仙跡徵應物
產後載唐宋元明序記詩賦等作

太姥志一卷

浙江巡撫
採進本

明史起欽撰起欽字敬所鄞縣人萬厯己丑進士
官福寧州知州太姥山在福寧州境傳堯時有老

母業採藍後得仙去故以爲名中有鍾離巖一線
天諸勝蹟起欽因創爲此書成於萬厯乙未前列
圖次列記序及題詠之作然山以巖壑寺宇爲主
法當分門編載起欽但爲總繪一圖悉不加分別
詮次非體例也

續刻麻姑山志十七卷

浙江汪啟淑家藏本

明左宗郢撰

國朝何天爵邱時彬重修宗郢南城人萬厯己丑進
士官至太常寺少卿天爵時彬皆建昌人麻姑山

唐時隸撫州故顏真卿麻姑仙壇記有撫州南城
縣之語今在建昌府城西十里宗郢志明史藝文
志著錄卷數相同此本每卷標題或稱麻姑而去
山字或又加洞天字或加丹霞字名目紛然可知
體例之龐雜考明史作續刻麻姑山志今姑從標
目焉

嵩書二十二卷

兩江總督
採進本

明傅梅撰梅字元鼎邢臺人萬厯辛卯舉人由登
封縣知縣擢刑部主事與員外郎陸夢龍力爭梃

擊一案鄭氏之黨中以察典罷官後起爲台州府知府崇禎中解職家居

大兵下順德抗節死贈太常寺少卿事迹附見明史張問達傳乾隆乙未

賜諡忠節是編乃其官登封知縣時所作分星政時勝卜營宸望嶽生官履巖棲黃齋竺業物華靈緒顏始章成爲十三篇立名頗嫌塗飾全書意在廣搜亦殊多駁襍

蜀中名勝記三十卷

浙江鮑士恭家藏本

明曹學佺撰學佺有易經通論已著錄按學佺所著本無此書之名此本乃萬厯戊午福清林茂之摘其蜀中廣記內名勝一門刻之南京而鍾惺爲之序不知其所取也

華嶽全集十三卷

兩淮鹽政採進本

舊本題明華陰縣知縣李時芳撰今按時芳之本千頃堂書目作十卷乃嘉靖四十一年所修至萬厯二十四年汝州張維新爲潼關道副使以時芳書多舛錯與華陰知縣貴陽馬明卿重加銓叙前

載圖說形勝物產靈異封號後載藝文增成十三
卷前有廵撫賈待問序及維新自序述之頗詳題
時芳所撰誤也後六年壬寅知縣河間馮嘉會又
增文數篇亦註於書內至所載

國朝祭告之文與宋琬蔣超諸人之詩則莫知誰所
續入考其中多有潼關道溧陽狄敬姓名意者卽
敬所增歟

九疑山志九卷

兩淮馬裕
家藏本

明蔣鎮撰鎮長洲人萬厯中官寧遠縣知縣九疑

山在寧遠縣南四十里相傳舜葬其地有舜廟焉
雖輿記流傳而舊無專志鎮始創修此編首紀祭
舜陵文次載形勝古跡人物仙釋土產次錄前人
碑記詩文崇禎中平陵俞向葵爲令復補圖於卷
首

羅浮野乘六卷

江蘇巡撫
採進本

明韓晃撰晃字賓仲南海人萬曆庚子舉人官青
田縣知縣是編首全圖次名峯次勝跡次仙釋次
品物次逸事書成於崇禎己卯其兄晟字寅仲亦

著羅浮副墨今未見

雁山志勝四卷

兩淮鹽政
採進本

明徐待聘撰待聘字廷珍常熟人萬曆辛丑進士
官至按察使副使是編乃其官樂清知縣時所撰
卷一爲山之名勝及人物土產襍事二卷三卷皆
佛刹四卷則所自作詩文也其凡例有曰舊志凡
詩賦題雁山者或以臨泣或以要津皆旁搜而詮
之而文之微占於山者亦聚焉又有欲世識其名
者賂剗厠氏私刻攙入真贋並收薰蕕莫辨山靈

有知定當作嘔今皆刪去云云其言可謂深中地志之陋習然舊作雖已汰除而又獨錄已作一卷其亦尤而效之矣

泰山紀事三卷

山東巡撫採進本

明宋燾撰燾字繹田泰安州人萬曆辛丑進士官翰林院編修此書一卷曰天集記天神事二卷曰地集記古跡三卷曰人集記名宦人物所言神鬼冥報已涉荒誕至泰山太守泰安知州爲守土之官柳下惠王章羊祜諸人亦不過生長其鄉並未

巖棲谷汲乃概行撫入不知於岱宗故事何涉也

天台山方外志三十卷

浙江汪啟淑家藏本

明釋無盡撰案錢希言獮園釋異篇曰有門法師名傳燈一號無盡太末人也出家天台之高明寺少精鍊戒行學識高出道流嘗撰天台山志甚有禪藻云云則無盡者乃其號也天台山自孫綽作賦以來登臨題咏翰墨流傳已多見於地志此書成於萬曆癸卯出自釋家之手述梵蹟者爲多與專志山川者體例稍殊故別題曰方外志焉

幽溪別志十六卷

浙江巡撫
採進本

明釋無盡撰幽溪在天台山無盡常居其地因撰
是志凡十六門每門附以藝文而同時人所作爲
多猶園稱其所至講習如雲蓋明末標榜之風浸
淫乎方以外矣

恒岳志二卷

兩淮馬裕
家藏本

明趙之韓王濬初同撰之韓汜水人官渾源州知
州濬初山陰縣舉人是書成於萬曆壬子其目十
一曰外紀星紀山紀廟紀祀紀事紀物紀游紀仙

紀文紀詩紀搜考頗稱詳核又以自宋以來皆祠
北岳於上曲陽故復取曲陽嶽廟詩附於卷末後
五年知州衡陽張述齡爲刻而行之然其文紀有
目無書已非完本矣

天目山志四卷

浙江汪啟淑家藏本

明徐嘉泰撰嘉泰字道亨循州人官於潛縣知縣
是書乃萬厯甲寅嘉泰因舊志重修浙江有東西
二天目東天目在臨安縣之西五十里西天目在
於潛縣西北四十五里據此書所圖則本屬一山

東西水源若兩目然故曰天目然此書所紀多屬西天目事統稱天目山志非也

烟雲手鏡二卷

浙江巡撫採進本

明楊繼益撰繼益始末未詳前有萬曆甲寅自序稱居恒遊思險遠因檢閱羣書撫其山川喜懼之境錄成二帙然所載諸山水俱隨手襍錄抄撮舊文無所損益既不注原書之名前後次序亦無義例如上卷有房山石徑山而房山水洞又在下卷上卷有牛首山鐘山而獅子山又在下卷以至廬

山之與瀑布金山之與妙高臺皆顛倒破析芬如
亂絲以比名勝志遊名山記諸書可謂每况愈下
矣

海陽山水志四卷

江蘇周厚
靖家藏本

明丁惟耀撰惟耀字貞白休寧人是書成於萬厯
戊午紀休寧境內名勝凡山二十九篇水八篇各
冠以圖所錄藝文但載序記銘頌諸體而不及詩
詞較他志之濫列題咏者稍爲簡淨然嚴於去取
可矣竟廢此一體則又矯枉過直也

惠山古今考十卷附錄三卷補遺一卷

浙江巡撫採進本

明談修撰修字思永無錫人是編以無錫惠山爲

一邑勝景唐張祐題詩有小洞穿斜竹重堦夾細

莎之句而舊跡已湮修營建以復其舊故首卷載

小洞重堦考及祠院庵觀諸考自二卷至十卷則

自唐及明之詩文附錄三卷皆同人賦贈之作補

遺一卷則雜紀惠山遺事卷末自跋有夢惠山之

神云云則未免幻妄矣

九鯉湖志六卷

兩淮馬祜家藏本

明黃天全撰天全莆田人其書成於萬厯中九鯉湖在福建仙遊縣天全以舊志僅載遊覽之作而遺山水乃重爲釐訂分爲山水建置夢驗藝文四門夢驗者以九鯉湖祠乃閩人所夢處也

龍門志三卷

浙江范懋柱家天一閣藏本

明樊得仁撰得仁不知何許人是書首載龍門圖及事跡次紀文類次紀詩類首卷考證甚陋若龍門特爲河水所經過止載水經注河水又南出龍門諸條足矣至撫及厯代河源則迂濶無當又玉

海云梁山之北有龍門山大禹所鑿通孟津河口
廣八十步是書旣已引之而後又引此數語別標

曰出魏地理志顛倒重複殊爲蕪襍

崆峒志三卷

江蘇周厚
堉家藏本

明李應奇撰應奇字鶴崖平涼人崆峒山在平涼
府城西是書成於萬厯中凡分七門曰分野曰建
草曰疆域曰形勝曰田賦曰仙蹟曰題詠然一山
之志卽不應及分野建草而中間兼記及瓦亭關
會盟壇之類又殊似府志之體例殊叢襍無限斷

也

峴山志六卷

浙江巡撫
採進本

明張睿卿撰睿卿字雅通號心嶽歸安人湖州府志稱其博雅豪邁遊歷山川以著書爲樂然是書頗無體例此峴山乃烏程之一山非城邑郡縣之比而首曰建置名實已不相副次曰勝概而多與建置互見不過襍載詩文三曰遺愛叙古名賢王右軍以下數人終於王世貞皆湖州大吏與山不甚相涉四曰社會五曰放生六曰藝文又先散載

各門均失之叢濫也

上天竺山志十五卷

兩淮馬裕
家藏本

明釋廣賓撰天竺爲東南巨刹舊有李金庭志廣
賓以其附會舛訛甚至僞撰明太祖竺隱說一篇
以炫俗乃刪補而成此書曰普門示現品曰尊宿
住持品曰器界莊嚴品曰帝王檀越品曰宰官外
護品曰風範隆污品曰詩文紀述品凡七門其風
範隆污一品於寺僧污行備書不隱較他志獨存
直筆據總目尙有卷首一卷此本已佚不存

爛柯山志二卷

兩淮馬裕家藏本

明徐日昞撰日昞後改名曰曦浙江西安人天啟壬戌進士爛柯山在衢州府城南三十里因晉樵者王質遇仙觀棋於此因以爲名日昞居與山近因纂輯晉唐迄明詩賦雜文以成是編

東西天目志八卷

兩淮馬裕家藏本

明章之采撰之采字去浮仁和人書作於天啟中以天目山東西二峯輯爲二志各分四卷起引述圖考訖詩賦紀跋杭州守李華然合而刻之

九華山志八卷

兩淮鹽政
採進本

明顧元鏡撰元鏡歸安人萬厯己未進士官池州府知府是書成於崇禎己巳前列全圖及十八景圖次列山水建置物產人物文翰五門門復各立子部意主誇多故山分爲六水分爲八寺院庵區爲三名樓閣亭館別爲兩類標目頗爲煩碎又杜荀鶴之污僞命宋齊邱之逞姦謀列之流寓以爲山水之光殊乏簡擇又王守仁游踪僅至亦列寓公併僞撰其贈周金和尚一偈斯尤地志之積習

矣

錫山景物畧八卷

江蘇周厚
堉家藏本

明王永積撰永積字崇巖自號蠡湖野史無錫人
崇禎甲戌進士官至兵部職方司郎中是書紀無
錫山川名勝畧分四正四隅每紀一地皆首載沿
草次載詩文永積詩亦往往附載然採錄過濫邀
飲聯吟之作動輒盈編於錫山地志圖經渺不相
涉則貪於標榜未講體例之過耳

橫谿錄八卷

兩淮鹽政
採進本

明徐鳴時撰鳴時字君和吳縣人崇禎乙亥選貢
生除武寧縣知縣橫谿鎮一曰橫塘在蘇州府城
西南十三里水自城中來西南橫流過鎮而入太
湖故名是志分十九門體例畧如郡縣志然如古
迹類中多列先賢舊宅又云其址無攷夫使遺墟
猶存自應深憑弔之思否則旣生是鄉自必人人
有宅安能一一虛列乎宜其一鄉之志蔓延至於
八卷也

閩阜山志二卷

兩淮馬裕
家藏本

明俞策撰策不知何許人閤阜山在江西新淦縣相傳爲張道陵丁令威修煉之所茲編上卷紀載形勝下卷編列藝文末自載其詩數首亦非佳作

太平三書十一卷

江西巡撫採進本

國朝張萬選編萬選字舉之濟南人官太平府推官是三書皆成於順治戊子其序例一曰圖畫二曰勝概三曰風雅圖凡四十有二見唐允甲題詞中此本佚其圖畫一卷惟存勝概七卷風雅四卷原本紙墨尙新不應遽闕失無考或裝緝者偶遺歟

乍浦九山補志十二卷

浙江巡撫
採進本

國朝李確撰確有平寇志已著錄乍浦在嘉興府東

南屬平湖縣境九山者雅山苦竹山湯山觀山龍

湫山暈頂山高公山蓋山獨山也平湖舊有九峯

之名而不得其地確始考而定之因著是編凡分

十二門曰圖譜山水古跡寺觀邱墓土產碑碣烽

塞石塘變怪人物題詠

昌平山水記二卷

兩江總督
採進本

國朝顧炎武撰炎武有左傳杜解補正已著錄炎武

博極羣書足跡幾徧天下故最明於地理之學是書雖第舉一隅然辨証皆多精確惟長城以外爲炎武目所未經所叙特多舛誤如稱塞外有鳳州不知蘇轍詩所云興州東谷鳳州西者乃回憶鄉關之語唐書遼志塞外均無鳳州之名也又如古北口楊業祠炎武據宋史辨其僞然劉敞蘇轍皆有過業祠詩在托克托修史之前幾二百載必執後代傳聞以駁當年之目見亦過泥史傳之失也

黃山志七卷

兩江總督
採進本

國朝閔麟嗣撰麟嗣字賓連歙縣人其書首列山圖
次形勝次建置次山產次人物次靈異次藝文次
詩賦蒐輯頗博而不盡精核

麻姑山丹霞洞天志十七卷

內府藏本

國朝羅森撰森字約齋大興人順治丁亥進士官至
陝西督糧道是編因明萬厯中左宗郢志而修第
一卷爲圖者八第二卷爲考者四第三卷爲表者
二第四卷爲志者四第五卷爲紀者五其餘藝文
分七卷末則麻源附錄一卷從姑附錄一卷育英

堂附錄一卷姑山襍記一卷詩文補遺一卷

峩眉山志十八卷

浙江汪啟淑家藏本

國朝蔣超撰超字虎臣金壇人順治丁亥進士官翰林院編修晚入峩眉山爲僧因輯是志昔劉勰奏請出家改名慧地梁書本傳雖著其事而傳首仍題原名蓋不與士大夫之爲僧也故今於超斯志亦仍題其原名云

峩眉志畧一卷

浙江汪啟淑家藏本

國朝張能鱗撰能鱗有詩經傳說取裁已著錄是書

於峨眉形勝古跡標撮甚畧末附詩文數篇而自作乃登其二佛光解一篇命意雖善措詞則未能免俗也

浯溪考二卷

山東巡撫採進本

國朝王士禎撰士禎有古懽錄已著錄是書前有自序稱楚山水之勝首瀟湘瀟湘之勝首浯溪浯溪以唐元結次山名得魯公磨厓書而益張之舊有浯溪前後兩集爲李仁剛綦光祖撰見於輿地碑目皆無傳今志乃出庸手冗襍泛濫至不可耐乃

以退食之暇窮搜遐摭要取精覈間錄詩賦雜文
多郡志溪志所未收者蓋其族姪官祁陽時以舊
志寄士禎士禎爲改作也其書不分門目上卷載
山川古迹及元結詩文而附以諸家之題識議論
下卷則皆後人藝文末爲補遺三條書頗簡核然
如王邕後浯溪銘吳儼祁陽石鏡銘鄒浩甘泉銘
其地相近類附可也吳師道汪氏浯村記地在新
安渺如風馬亦復載入殊乖體裁蓋斷限之難劉
知幾嘗言之矣

長白山錄一卷補遺一卷

山東巡撫
採進本

國朝王士禎撰長白山一名常白山一名常在山在

鄒平縣東南是錄皆紀其山形勝及故實藝文已

編入士禎漁洋文畧第十四卷中此其別行之本

也末附補遺一卷則因宋紹定間丁黼作池州范

仲淹祠記以青陽縣東十五里之長山指爲長白

地理舛誤襍引諸說以辨之考証亦確然附會古

賢誇飾形勝移甲入乙乃天下地志之通弊士禎

以此一記奪其鄉中之流寓遂詆之爲小人所見

亦爲不廣矣

鼓山志十二卷

兩淮鹽政
採進本

國朝僧元賢撰其序不標年月書中記事至順治壬辰癸巳則

國初人也鼓山在福州城東三十里是書分勝跡建置開士貞珉藝文叢談六門大旨以佛刹爲主名爲山志實則寺志耳其凡例有云茲山知名海內者實以人重非以形勝重也縉徒妄自標置可謂不知分量者矣

恒岳志三卷

浙江巡撫採進本

國朝張崇德撰崇德字懋修順天人官渾源州知州

北岳恒山在渾源州城南二十里自漢以後皆祠

於上曲陽

國朝順治十七年以刑科都給事中粘本盛之請改

祠於渾源州部議令山西撫司官吏詳察恒山遺

跡於時主其說者禮部尙書王崇簡疏載所著青

箱堂集中據紳耆之議以上達者卽崇德也故輯

斯志於祀典特詳曲陽飛石之僞亦辨之甚悉

七星巖志十六卷

浙江汪啟淑家藏本

國朝韓作棟撰作棟字公吉鑲藍旗漢軍順治中官分巡肇高廉羅道按察司僉事七星巖在肇慶府高要縣城北一名崧臺一名定山故此書又名定山石室志也志本明王泮所撰作棟因而重修吳綺又爲之潤色然有關考核者寥寥無多如石刻門於唐李邕石堂記後乾道己丑秋一條以後人題名之年月誤爲摹石之年月又載元符改元端午日眉山蘇軾挈家來遊不思元符元年蘇軾正

在儋州安得有挈家至七星巖之事此蓋據曹學

佺名勝志所載而不知為傳訛之文也

峩眉山志十八卷

浙江汪啟淑家藏本

國朝曹熙衡撰熙衡字素徵錦州人順治中官至貴

州按察使是編因蔣超舊志成於疾病之餘未能

條理明析故即其本而重訂之然據卷首修山志

說實戎州宋隸樟所定熙衡時分廵建昌道董其

事耳末一卷為志餘仍題超名而中論普賢住世

一條有宜太史蔣公之辨論語則亦非超之本文

矣

龍唐山志五卷

浙江巡撫
採進本

國朝僧性制撰龍唐山在昌化縣西七十里以其上有龍池故名浙江通志作龍塘獨此本作唐其中龍池一條內唐井等字亦從唐殆亦猶錢塘錢唐各異文歟志本爲佛刹而作故多述禪家之語非地志之正體也

寶華山志十卷

兩淮馬裕
家藏本

國朝釋德基撰寶華山在句容縣北六十里齊釋寶

誌築廬於此後人重寶誌之名因以名山是山以道場顯故首誌開創興起而次及山水梵宇各門與他山志書體例稍異固亦各因其地耳

廬山通志十二卷

兩淮馬裕家藏本

國朝釋定暲撰因明嘉靖間桑喬廬山紀事而稍增損之無大發明考正

四明山志九卷

江蘇周厚培家藏本

國朝黃宗羲撰宗羲有易學象數論已著錄四明山舊稱名勝而巖壑幽邃文士罕能周歷故記載多

踈宗羲家於北七十峯之下嘗捫蘿越險尋竄匝
月得以考求古跡訂正訛傳乃博采諸書輯爲此
志凡九門宗羲記誦澆通序述亦特詳贍惟所收
詩文過博併以友朋唱和之作牽連附入猶不出
地志之習又旣列名勝復以皮陸九題丹山圖詠
石田山房別出三門其諸門之內旣附詩於各條
下又別出詩括文括二門爲例亦未免不純也

四明山古跡記五卷

浙江巡撫
採進本

不著撰人名氏亦無序跋詳書中所載卽黃宗羲

所撰四明山志稿本也宗羲四明山志自序有曰
壬午歲余作四明志亡友陸文虎欲刻之而未果
癸丑歲盡偶展此卷文虎評較之朱墨如初脫手
然其間凡例不齊詞不雅馴重爲竄改始得成書
其序作於康熙十一年所稱壬午蓋明崇禎十六
年也此書不署年月亦無文虎姓名題識而中有
朱墨數處與宗羲序合殆卽文虎評較之本歟其
第三卷四卷五卷內有黃時貞添註四條其一條
稱壬辰六月識又一條述老人談天啟間事常在

順治九年以後或時貞得此稿本又以意爲訂正
耶四明山志既有成書此未定之草固可置而不
論矣

西湖夢尋五卷

浙江鮑士
恭家藏本

國朝張岱撰岱字陶菴自號蝶菴居士家本劍州僑
寓錢塘是編乃於杭州兵燹之後追記舊遊以北
路西路南路中路外景五門分記其勝每景首爲
小序而襍採古今詩文列於其下岱所自作尤夥
亦附著焉其體例全仿劉侗帝京景物畧其詩文

亦全沿公安竟陵之派

穹窿山志六卷

兩淮馬裕家藏本

國朝李標撰山在蘇州府城西是編前四卷雜錄序記疏引等作後二卷紀遊覽題贈之詩蓋是時道士施亮生居此山方以符術鳴於東南其書實爲亮生而作非專志山之名勝也

苕城烟水九卷

浙江巡撫採進本

國朝徐崧張大純同編崧吳江人大純長洲人前有尤侗序大畧稱崧有詩名好遊佳山水間嘗綴集

吳地古跡爲此書取華嚴南詢之意以名之其友
張大純助其摭摭未畢而崧歿大純因重加纂輯
刊行凡蘇州府及所屬諸縣名勝山川並爲臚載
然每條詮叙簡畧而所錄題詠至夥蓋頗仿祝穆
方輿勝覽之例以詞藻爲尙而不主考証然穆書
徧及州郡此獨有姑蘇一隅穆書於前人著述採
擷甚富而此所收率係近人之作并附入已詩則
又出穆書之下矣書刊於康熙庚午時尙未升太
倉爲直隸州故太倉及嘉定崇明二縣皆列於此

書云

螽磯山志二卷

安徽巡撫
採進本

國朝柯願撰願字又鄒龍溪人康熙甲辰進士以主
事督理蕪湖鈔關螽磯山在蕪湖西南七里大江
中江南通志云螽老蛟也今磯有石穴廣一丈深
不可測按廣韻螽古堯切水蟲似蛇四足能害人
賈誼弔屈原文所謂偃螽獺以隱處者是也通志
所云未知何本山上有靈澤夫人祠相傳蜀先主
妃孫權妹死葬於此故廟祀焉其事不見於史傳

殆齊東之語耳是編蓋因明邊維垣舊本原文重訂首爲圖末附載扁聯所錄率荒唐之說惟宏治中劉淮嘉靖中王宗聖二記稍能引據史傳以駁俚說而亦終歸於附會餘皆蕪襍又凡例稱降乩之作不錄而卷末仍有諸葛亮徐庶鄧芝詩皆七言絕句殆足笑噓尤前後自相矛盾云

嶽麓志八卷

浙江汪啟淑家藏本

國朝趙寧撰寧字又裔山陰人官長沙府同知是志因舊本增輯成於康熙丁卯第一卷爲新典及圖

說二卷爲山水古蹟新建寺觀疆域三卷爲書院
四卷以下皆藝文也卷首序文自爲一巨冊當全
書四分之一同修姓氏列至一百四十二人則其
書可知矣

說嵩三十二卷

直隸總督
採進本

國朝景日珍撰日珍字東陽登封人康熙辛未進士
官至戶部侍郎是書自卷一至卷八統紀嵩高及
二室卷九以下分星野形勝封域巡祀古迹金石
傳人物產仙釋摭異藝林風什九門考嵩山爲中

岳本於爾雅毛詩故史記主其說胡渭禹貢錐指
信爾雅前條河南華之文而指後條嵩高爲中岳
乃後人附益然鄭康成註大司樂謂華爲中岳而
註小宗伯則以嵩爲中岳賈疏謂大司樂註據鎬
京小宗伯註據洛邑其說似可與爾雅前後二文
相証卽云後人附益而康成已兼據之矣又外方
之爲嵩山見於尙書孔註水經注諸書金吉甫乃
謂嵩高非外方殊不知此書於中岳宗史記於外方
引水經注考核殊不謬然嵩書及嵩山志天下名

山志之類於此山形勝沿革已爲廣徵博輯此特綜彙舊文踵而成之耳

嵩嶽廟史十卷

江蘇巡撫採進本

國朝景日珍撰是書以嵩嶽廟舊未有志因創爲編輯分圖繪星野沿革形勢營建祀典靈異嶽生詩賦藝文各爲一卷其凡例謂漢武之登封孝明之巡幸胡后武曩之離宮別院事涉游盤無闕秩祀概從刪削可謂矜慎然靈異類中所引述異記虞初志諸書半是寓言藝文類載嵩嶽嫁女記尤爲

不經詩賦藝文析爲二類金石之文如石闕碑別見於營建類中亦爲錯亂則亦仍地志之龐雜而已

鷄足山志十卷

浙江汪啟淑家藏本

國朝范承勳撰承勳鑲黃旗漢軍大學士文程之子浙閩總督承謨之弟官至雲貴總督鷄足山在雲南賓川州東一百里一頂三支儼如鷄距在蒼山洱海之間相傳爲迦葉尊者入定處佛寺最多故志山者多述佛門之事是編乃康熙三十一年承

勳因舊本增修分圖記攷証星野形勢山水寺院
人物靈跡物產藝文凡十門而以迦葉像讚冠於

卷端焉

普陀山志十五卷

內府藏本

國朝朱謹陳璿同撰謹有中庸本旨已著錄璿始末
未詳普陀山在定海縣東海中佛經稱爲觀音大
士道場自梁迄明代有興建是志所述本末頗具
而叙事冗沓無法

湘山志八卷

浙江巡撫採進本

國朝徐泌撰泌字鶴汀衢州人康熙中官全州知州
以州有湘山寺祀無量壽佛率郡人謝允復等考
佛出身本末竝山水古跡藝文輯爲是書

林屋民風十二卷

浙江鮑士
恭家藏本

國朝王維德撰維德字洪緒吳縣人是書成於康熙
癸巳因蔡昇太湖志王鏊震澤編翁澍具區志而
廣之林屋爲洞庭西山之別名維德以太湖諸山
洞庭最大故舉以名其集而諸山則附載焉其所
採錄賦咏居多考証殊妙如所載馬跡山引毘陵

志以証舊志之誤津里山之一名秦履山引四蕃志以証具區志之非特偶然一見耳目錄載附見聞錄一卷此本無之或偶佚歟

廬山志十五卷

安徽巡撫採進本

國朝毛德琦撰德琦字心齋鄞縣人由貢生官星子縣知縣是編取桑喬廬山紀事吳煒廬山續志二書彙而訂之首星野次輿地次祀典次隱逸次仙釋次物產次襍志次灾祥共一卷次山川分紀十二卷次藝文二卷琦自序云山川分紀多仍其舊

文翰則隨時而增書之冗濫二語已自道之矣

玉華洞志六卷

浙江巡撫
採進本

國朝陳文在撰文在字新我將樂人將樂縣南十里
許有玉華洞幽深窈窕秉炬乃入其中石鍾乳滴
成人物諸形千態萬狀一一曲肖爲閩中奇觀明
萬厯壬辰邑令海陽林熙春始爲志順治甲午邑
令曲阜孔興訓重修歲久板燬康熙乙未文在又
復修之冠以圖景而序記賦詩之屬以次備錄末
有慶玉華詩一册則以邑人鬻煤燒鑿洞且頽壤

雍正辛亥邑令馮景增始禁開窯場邑人作詩慶之併彙成帙附於志末云

羅浮山志十二卷

內府藏本

國朝陶敬益撰敬益江寧人康熙中官博羅縣知縣是編因黎惟敬舊志益以僧塵異名峯圖說互相補苴合爲一書然首有圖經又有名峯圖又有巖洞志前後繁複殊無義例是則兼取兩家未能融鑄剪裁之故也

羅浮山志會編二十二卷

兩淮馬裕家藏本

國朝宋廣業撰廣業字澄溪長洲人康熙中官至山東濟東道後因其子志益爲瑞州知府就養官署以羅浮爲嶺南勝地而舊志簡畧遂重爲考訂網羅缺逸計事增舊十之五後來羅浮諸志多以是爲藍本云

羅浮外史

無卷數 浙江巡撫採進本

國朝錢以塏撰以塏字蔗山嘉善人康熙中歷官東莞茂名二縣知縣羅浮山屬於博羅而遊人登眺則多由東莞之石龍鄉以塏官東莞時其父瑛就

養縣署往遊羅浮記其名勝以壇因叅考諸籍以成此編首列圖二十次述山中名勝靈跡爲五十八篇大抵多因仍舊志又多以近人詩參錯其中

惠陽山水紀勝四卷

浙江江啟淑家藏本

國朝吳騫撰騫字益存號樂園當塗人康熙辛未進士官至惠州府知府是編以羅浮與西湖各分上下二卷其紀羅浮則本宋廣業羅浮志稍爲芟節其紀西湖則本近人增輯西湖志而更編之亦間有所補正他如霍山河源龍川亦隸惠州稱名勝

而志不及焉蓋專爲二地作也惠州在漢曰南海
晉曰東官隋唐或曰循或曰雷鄉至宋仁宗時始
曰惠州而惠陽之名則於傳無之以是標題亦相
沿杜撰之文矣

西樵志六卷

浙江汪啟淑家藏本

國朝馬符錄撰符錄字受之南海人官陸豐縣訓導

西樵山屬南海縣在廣州府城西南一百二十里

明萬曆辛卯郡人霍守尙初爲之志歲久散佚

國朝羅國器重修未竟符錄乃因其舊本葺爲此編

詳於人物藝文而畧於考證故山中金石之文悉不錄云

武夷九曲志十六卷

浙江巡撫採進本

國朝王復禮撰復禮有家禮辨定已著錄武夷山在福建崇安縣南三十里其溪九曲宋劉道元初爲作志其後屢有增輯是書成於康熙五十七年前卷旣以詩文分入山水而後卷又列藝文一門體例頗雜又附錄已作連篇累牘是竟以山經爲家集矣

西湖志四十八卷

通行本

國朝傅王露撰王露號玉筍會稽人康熙乙未進士官翰林院編修乾隆辛巳

特恩加中允銜初雍正三年

命浙江總督李衛開濬西湖越三年而蒞功時衛方奉

詔纂修通志以西湖志自田汝成後久未續輯因以王露

總其事而以舉人厲鶚等十人分任纂修悉仿通

志之例分門記載列目二十徵引極博而體例頗

涉汜濫其後梁詩正等復訂爲西湖志纂實據此

本而刪潤之云

太嶽太和山紀畧八卷

江蘇巡撫採進本

國朝王概撰概字成木諸城人雍正癸丑進士官至

兩廣鹽運使是編乃概官分守安襄鄖兵備道時

所作凡爲十類曰星野曰圖考曰山川曰聖紀曰

宮殿曰祀典曰仙真曰物產曰拾遺曰藝文較舊

志蒐輯頗富而亦不免於蕪襍

峽石山水志一卷

浙江巡撫採進本

國朝蔣宏任撰宏任字擔斯海寧人海寧縣有峽石

鎮兩山並峙東曰審山西曰紫微山爲土人游眺之所宏任因爲之志末有雍正戊申自跋稱舊有志畧爲前輩沈伯翰所集其家伏羌令丹崖所訂則仍舊稿增修也敘述頗爲雅潔然兩山舊跡載於咸淳臨安志者甚詳皆畧而不載審山之名沈山宋元時志書皆有辨証亦未徵引而紫微山有東峯磨劍池敘述更爲疎漏惟所載碧雲寺之建於唐大厯中天開圖畫樓之起於宋天聖間爲足補志乘所未及爾

雁山圖志

無卷數 江蘇 巡撫採進本

國朝僧實行撰實行字奕庵山陰林氏子居雁山能仁寺因搜羅名勝編次成書首雁山十八刹皆有圖次山水諸說次藝文

金井志四卷

浙江巡撫 採進本

國朝姜虬綠撰虬綠字秋島烏程人自號蒼弁山人又號大海樵人案金井在烏程之黃龍山後梁丙子有黃龍破洞出又名黃龍洞虬綠卜居弁山時得遊覽因作此志成於乾隆庚午自序謂住山以

來日有記錄并見古人詩歌襍識手輒抄摘凡分
山谷文獻金石藝文四門然藝文內多附此錄所
自作不若待諸論定後也

泰山道里記一卷

兵部侍郎紀昀家藏本

國朝聶欽撰欽字劍光泰安人是編前有自序稱生
長泰山下少爲府胥性嗜山水每攀幽巖險探稽
往躅因讀劉其旋泰山紀畧成城泰山勝概其中
有一地兩稱或名同地異岩谷深阻題刻爲苔蘚
所蔽者間遺而未錄近乃架梯刮磨垢蝕而求之

雖風雨寒暑弗憚其勞又質之野老參考羣書竭
半生精力彙成一編提挈道里爲綱領分之爲五
合之爲一曰泰山道里記末有其從孫學文跋稱
其蒐討金石之文閱二十餘年凡諸記載所未詳
者如石經峪刻金剛經據徂徠刻石辨爲北齊王
冠軍書唐紀泰山銘下截剝落葉彬補書百八字
宋述功德銘磨勒岱巔鑿毀原碑字猶存介邱岩
分水谿及古明堂均失覈蓄疑又肅然山奉高城
季札子墓與白驪冢俱誤指其地汶泮三谿諸水

皆牽混源流岱背琨瑞靈岩諸山因隸他縣而未錄併逐加考驗辨訛補闕蓋以土居之人竭平生之力以考一山之跡自與傳聞者異矣

峽川志一卷

兩淮馬裕家藏本

國朝潘廷章撰廷章字梅巖自稱海峽樵人蓋海寧人也其書志峽石一鎮之事頗有條理然一村落之微而首紀分野未免太廓科第皆列之人物毫無行實但載其由某經中式某科第幾名亦未免太濫所紀唐許遠守睢陽臨難作死別吟其詞不

類疑亦附會也

西湖覽勝十四卷

內府藏本

國朝夏基撰基字樂只杭州人是編因明田汝成本重修十四卷中題咏居其六卷

南湖紀畧稿六卷

浙江巡撫採進本

國朝邱俊撰俊字晴巖仁和人南湖一名白洋池在杭州城北隅宋張俊賜第四世孫鋹別業據湖之上湖在宅南因名南湖楊萬里陸游諸人皆爲之題咏而鋹亦以自名其集遂傳爲古跡俊少居其


地因采輯宋時志乘及說部文集勒成此志

右地理類山川之屬九十七部九百卷

內二部
無卷數

皆附

存目



欽定四庫全書總目

史部
卷七十八

欽定四庫全書總目卷七十七

史部三十三

地理類存目六

大滌洞天記三卷

浙江汪汝璩家藏本

舊本題元鄧牧撰

案牧以宋人入元不仕而卒據陶潛書晉之例當仍題宋人今

特據舊本所題書之

核其書卽牧所撰洞霄圖志內宮觀山水洞府古蹟碑記五門而刪其人物每門又頗有

刊削不皆全文卷首吳全節沈多福二序亦同惟

增入洪武三十年任嗣教真人張宇初一序

稱今年春某官道士某持宮志請序將廣於梓蓋
明初道流重刻時妄以其意刪節之而改其名也

西嶽神祠事錄七卷

兩淮鹽政
抹進本

明孫仁編仁貴池人景泰辛未進士官至戶部右
侍郎是書乃其官西安知府時作以記西嶽神祠
之事所錄文章具載首尾年月撰人姓名較張維
新華嶽全集所載頗爲完整有體其中延熹華山
廟碑一篇則剝泐已甚非復洪氏隸釋之舊矣

石湖志畧一卷文畧一卷

浙江范懋柱家
天一閣藏本

明盧襄撰襄字師陳吳縣人嘉靖癸未進士官至
兵部職方司郎中石湖在蘇州府城西南宋范成
大爲執政時有別墅在湖上孝宗御書石湖二字
以賜其名始顯盧氏世居於此襄乃述其山川古
蹟爲志畧又集諸人題咏爲文畧然此書爲范氏
別業而作自應以一地爲主與州郡輿記爲例
各殊襄乃兼及人物多至二十有一人匪獨詞涉
誇張抑亦體傷汜濫矣

石鼓書院志四卷

浙江范懋柱家
天一閣藏本

明周詔撰案是時有二周詔一爲延津人嘉靖庚戌進士見太學題名碑一卽此周詔號臺山富順人嘉靖癸巳官衡州府知府石鼓書院在衡州府治北石鼓山宋景祐間允集賢校理劉沆之請賜額置田與睢陽嶽麓白鹿號爲四大書院講學家喜稱道之詔官於衡州因剿取舊志稍增損以爲此編首地理次室宇次人物次詞翰而附錄文移於末潦草漏畧殊無義例蓋書帕本也

淨慈寺志十卷

浙江巡撫
採進本

明釋大壑撰大壑字元津杭州淨慈寺僧案淨慈寺在杭州城西南屏山舊無志大壑始創修之其書分形勝建置法嗣檀護著述僧制靈異七門自序稱斷碣磨厓冥搜必錄蓋二十載而始成其用力亦勤矣

徑山集三卷

浙江巡撫
採進本

明釋宗淨撰宗淨始末未詳徑山在臨安縣天目山東北唐代崇時僧法欽始造寺是書上卷記寺之建置中卷記禪宗下卷載藝文原刻校讐不精

僧方一序謂其魯魚亥豕疊出爲白璧蠅玷云

白鷺洲書院志二卷

浙江汪啟淑家藏本

明甘雨撰雨有古今韻分注撮要已著錄初宋淳祐辛丑江萬里知吉州建書院於白鷺洲洲在二水之中故借李白詩二水中分白鷺洲句以名之非金陵之白鷺洲也時宋理宗方重道學爲賜額立山長嗣後遂相承爲古跡萬厯辛卯黃梅汪可受爲吉安府知府又重修之雨因撰是志分沿革建置教職祀典儲贍名宦人物公移賢勞義助紀

述書籍生祠記十三門生祠記者即可受生祠也
至別立爲一門此其作志之意不在書院矣

歷代山陵考一卷

兩淮馬裕
家藏本

明王在晉撰在晉字明初太倉人萬曆壬辰進士
官至兵部尚書事迹附見明史王洽傳是書僅從
一統志抄撮而成無所考證况旣名山陵而趙宣
子孟嘗君輩遺塚亦列其間尤非體也

方廣巖志四卷

江西巡撫
採進本

明謝肇淛撰肇淛有史牘已著錄方廣巖在永福

縣東宋給事中黃非熊嘗讀書山中作十咏以紀其勝肇泐時爲工部郎奉使過家遊於是巖因輯爲此志前有義例稱作本紀以志方廣作外紀以志旁近之巖壑作別紀以志方外作文紀詩紀以輯前人之作然本紀之名史家以載帝王事迹用之山水殊乖體例別紀信志寧之托生三元德涵之麗刑地獄佛氏之說儒者所不道詩紀末有國朝人所作則雍正中江績重修是書所附入也

石鼓書院志二卷

兩淮馬裕家藏本

明李安仁撰安仁字裕居遷安人萬厯中官衡州府知府是編因周詔舊志重修分上下部上部紀地理室宇人物名宦下部載藝文採摭較詔志爲詳

關中陵墓志二卷

兩淮鹽政採進本

明祁光宗撰光宗後更名伯裕滑縣人萬厯戊戌進士官至兵部尙書是編乃光宗督學陝西時於厯代陵墓詳加考証各爲之圖而係之以說其距諸州縣城方隅道里皆備志之亦皇覽聖賢冢墓

記之流也

金陵梵刹志五十三卷

編修汪如藻家藏本

明葛寅亮撰寅亮有四書湖南講已著錄是書志金陵梵刹依僧錄分攝以靈谷天界報恩三大寺統次大寺五中寺三十有二小寺百有二十其餘廢寺別爲一編卷首冠以御製欽錄二集御製者太祖之詩文欽錄者沿革之案牘也未附以南藏目錄及諸經租額公費僧規公產諸條例其餘皆畧如志乘之體編次頗傷蕪雜

徑山志十四卷

浙江巡撫
採進本

明宋奎光撰奎光字培巖萬厯壬子舉人官餘杭縣教諭是編蓋增補宗淨舊志而成分開山諸祖及制勅詩文名勝古蹟土產諸門殊多猥瑣蓋一山一寺地本偏隅宗淨志已具梗概奎光必從而恢張之其冗沓宜矣

延壽寺紀畧一卷

兩淮馬裕
家藏本

明釋圓復撰圓復字休遠鄞縣人與屠隆同時延壽寺在鄞縣南三里舊號保恩院宋祥符間改今

名是書詳述知禮禪師本末及宋相曾公亮置買莊田舊事他無所載蓋自備古剎之典故而已

禹門寺志六卷

兩江總督
採進本

明戴英撰英字上慎宜興人崇禎甲戌進士禹門寺在宜興之龍池山是編前志山寺僧侶後紀碑銘序記詩文多未雅馴

鄧尉聖恩寺志十八卷

江蘇周厚
堉家藏本

明周永年撰永年字安期吳江人鄧尉故有沈津志茲編乃踵而增之凡梵宇名釋序記語錄無不

備載大約於寺之建置本末尤爲詳悉故以聖恩
寺志爲名書成於崇禎十五年而中有康熙中碑
刻及宋犂徐秉義詩文蓋後人所續入也

天童寺集二卷

兩淮馬裕
家藏本

明楊明撰明不知何許人天童寺在鄞縣東六十
里晉永康間義興禪師居此山有童子來供薪水
久之辭去自稱太白星因是山名太白寺名天童
茲編敘述形勝綴以藝文前序無姓名疑卽明所
自作中稱撰爲七卷今止兩卷似尙非完帙也

南溪書院志四卷

兩淮鹽政
採進本

明葉廷祥郭以隆紀延譽陳翹卿同撰廷祥官尤溪縣知縣以隆稱暑縣事疑爲丞簿之類延譽翹卿則尤溪教諭訓導也其里貫均未詳南溪者朱子之父松作尉尤溪實生朱子於其地理宗嘉熙初尤溪令李修以時方崇尚道學人爭攀附遂於其地建二朱先生祠卽書院所自昉也志中載書院額爲帝熈德祐元年所賜而李韶所作記在嘉熙改元之歲已稱南溪書院則初建時已有此名

矣但賜額在後耳其書僅記書院之蹟所附詩文亦多不雅馴延譽之序以朱松朱子及宋理宗皆跳行別書使君臣相並則欲尊朱子而不知所以尊悖謬甚矣

破山興福寺志四卷

兩淮馬裕家藏本

明程嘉燧撰嘉燧字孟陽休寧人崇禎末布衣明史文苑傳附載唐時升傳末常熟縣西北十里有破山其麓有寺曰興福乃齊梁間所建是書一卷二卷記山中古跡而詩文附焉三卷志建置四卷

志禪宗序次雅潔爲山志差善之本

靈隱寺志八卷

兩淮馬裕
家藏本

國朝孫治撰徐增重編治字宇台仁和人增字子能
吳縣人其書因明萬厯中昌黎白珩之志稍增損
之體例與他志畧同惟以宦遊寄寓之人彙收之
人物一門則事涉創造於義未安

滄浪小志二卷

浙江巡撫
採進本

國朝朱肇撰肇字牧仲號漫堂商邱人由廕生官至
吏部尚書是編乃肇爲江蘇巡撫時得宋蘇舜欽

滄浪亭舊址重爲修葺因蒐輯前人傳記詩文而附以所作記一篇詩一首及尤侗范承勳詩各一首共爲一集當時頗稱其好事然其所採多爲舜欽而作與亭無涉又南禪寺雖附近亭旁而實非當日之故址一概泛載亦未免稍失斷限矣

杏花村志十二卷

浙江巡撫採進本

國朝郎遂撰遂字趙客號西樵子池州人按杜牧之爲池陽守清明日出遊詩有借問酒家何處有牧童遙指杏花村句蓋泛言風景之詞猶之楊柳岸

蘆荻洲耳必指一村以實之則活句反爲滯相矣
然流俗相沿多喜附會古蹟以夸飾土風故遂居
是村卽以古今名勝建置及人物藝文集爲是編
蓋亦志乘之結習也至於郎氏族系亦附錄其中
則併非志乘體矣

二樓小志四卷

浙江巡撫
採進本

國朝程元愈撰汪越沈廷璐又補葺之與佟賦偉二
樓記畧一書相爲表裏皆記寧國府南北樓事北
樓卽謝朓之高齋南樓卽文昌臺明嘉靖中知府

朱大器所建也賦偉書旁涉他事殊爲龐雜此則
輯錄歷代題咏并記南樓建造之始末差爲有緒
越有讀史記十表已著錄元愈字偕柳廷璐字元
佩皆寧國人

青原志畧十三卷

兩淮馬裕
家藏本

國朝僧大然撰施閨章補輯大然始末未詳閨章字
尙白號愚山宣城人順治己丑進士官至江西布
政司叅議康熙己未

召試博學鴻詞授翰林院侍讀青原爲吉州名勝自唐行

思禪師開山說法以後遂爲巨刹至明王守仁羅
洪先歐陽德諸人於此講學故第三卷特立書院
一門畧記當時問對之語而所採錄皆理之近於
禪宗者則緇流援儒入墨借以自張其教也

崇恩志畧七卷

江西巡撫
採進本

國朝僧智藏撰智藏字竺堂安福人崇恩寺在廬陵
創自吳赤烏中屢經廢興康熙丙午智藏重修之
因輯是書一卷山水道場及歷代住持上堂語錄
二卷記疏三卷詩對聯四卷序五卷啟書六卷雜

著法語七卷法產大旨在張皇佛教以外護爲至
榮殊不類出世入語體例亦蕪雜之甚

江心志十二卷

浙江巡撫
採進本

國朝釋元奇撰江心寺在温州府北永嘉江中卽謝
靈運詩所謂亂流趨正絕孤嶼媚中川者也宋高
宗嘗幸其地稱爲名勝明釋成斌郡人王暘谷始
創爲之志元奇因舊本重加編輯凡紀蹟一卷勅
書一卷藝文八卷世系雜記二卷

白鹿書院志十六卷

安徽巡撫
採進本

國朝廖文英撰文英有正字通已著錄初唐李渤與其兄涉讀書廬山蓄一白鹿甚馴因名白鹿洞宋初置書院於五老峯下朱子守南康軍援嶽麓書院例疏請賜額遂爲四大書院之一康熙中文英爲南康知府因卽舊志修輯以成是書意求繁富頗失剪裁

靈谷寺志十六卷

兩江總督採進本

國朝吳雲撰雲號舫翁安福人靈谷寺在江寧鍾山之左明太祖遷梁寶誌塔於此改賜今名而號其

山曰紫金舊有景泰間僧潔菴嘉靖間黃河二志
康熙庚辰雲重輯爲是編前有雲自序及寺僧寂
曙所紀修輯緣起凡分二十四類其門目皆因明
志之舊僅畧爲刪補耳

白鹿書院志十九卷

安徽巡撫
採進本

國朝毛德琦撰德琦有廬山志已著錄康熙甲午德
琦爲星子縣知縣因取廖文英原志重加訂正分
類凡十曰形勝曰興復曰沿革曰先獻曰主洞曰
學規曰書籍曰藝文曰祀典曰田賦形勝等七門

皆因舊志與復主洞書籍三門則德琦所增也

通元觀志二卷

浙江巡撫
採進本

國朝吳陳琰撰陳琰有春秋三傳同異考已著錄通元觀在錢塘縣宋紹興中劉鹿泉請於高宗建爲修真之所嘉靖中姜南始志之陳琰以姜志未備更爲此書

孔宅志六卷

兩江總督
採進本

國朝諸紹禹撰紹禹松江人青浦縣治之北地名孔宅舊有孔子廟相傳隋末孔子三十四代裔孫蘇

州刺史禎僑寓於吳乃立家廟并葬先聖衣冠於此後漸湮廢明陸應陽重修之始述爲孔廟記陳功又作續記康熙中紹禹增刪舊本以成是編案禎生於隋代不應尙存先聖衣冠卽有之亦不應携至吳中且隋時郡縣並無蘇州之名其說殊未可盡信也

丹霞洞天志十七卷

兩江總督採進本

國朝蕭韻撰韻字明發南城人康熙中舉人明萬厯中建昌府知府鄔齊雲嘗屬郡人左宗郢爲麻姑

山志久而板燬康熙中湖東道羅森復令韻增補成之首系以圖次列考表志記諸目而於題咏詞

賦爲尤詳

武林志餘三十二卷

浙江巡撫採進本

國朝張暘撰暘字東溥號滌岑錢塘人是書搜輯武林諸名勝於道觀祠廟名賢古蹟紀載尤詳其末一卷附錄方物亦頗有考訂名志餘者欲以補前志所未備也然採摭頗富而體例未精往往失之冗雜所錄近人題咏亦殊少別裁

東林書院志二十二卷

兩江總督
採進本

國朝高桂高隆高廷珍高陞許獻同撰桂等四人皆高攀龍之裔獻亦攀龍同縣人也其書分建置院規會語祀典列傳公移文翰典守著述軼事十門意在博搜廣採而體例冗雜頗甚所附諸人又多冒濫乃至孫承澤亦廁其間

增修雲林寺志八卷

浙江巡撫
採進本

國朝厲鶚撰鶚有遼史拾遺已著錄是編成於乾隆甲子以靈隱舊志脫漏尚多且

聖祖仁皇帝省方南幸駐蹕山中

賜名雲林寺不宜仍用舊名故因前志而增輯之首紀

宸恩次山水次禪祖次法語次檀越人物次藝文詩詠而

以遺事雜記終焉

宋東京考二十卷 浙江巡撫採進本

國朝周城撰城號石匏嘉興人是書前有雍正辛亥

王璠序稱城客大梁三載隨境討蒐以成此書其

凡例有云建隆以前東京非宋靖康而後宋不東

京蓋專紀汴都一百七十年之遺蹟而作也每條

皆援引舊書列其原文蓋仿朱彝尊曰下舊聞之體然多引類書其博瞻殊不及彝尊又多載雜事務盈卷帙如所引宋稗類抄二近侍爭辨貴賤由天一事因首有仁宗御便殿一語遂列之宮殿類中然則一代帝王何事不在宮殿內豈勝載乎他如造字臺吹臺繁臺卷中所引各書皆謂一臺而數名乃於繁臺則併入吹臺又別立造字臺名之類多彼此牴牾無所考証其精核亦不及彝尊也

鷺湖講學會編十二卷

江西巡撫採進本

國朝鄭之僑撰之僑字東里潮陽人乾隆丁巳進上官至寶慶府知府鷺湖爲朱陸講學之所今其地屬鉛山之僑官鉛山知縣時因作是編首卷爲之僑所作圖傳贊考二卷至八卷皆四賢問答諸書及學規條約講義九卷爲之僑及雷鉉所立條約十卷十一卷皆自宋迄今詩文之有關於鷺湖者而之僑所作亦並錄焉十二卷則之僑所作鷺湖書田志也書中大旨多調停朱陸之異同其意蓋欲附於講學然實則惟以書院爲主故題咏名勝

諸作亦皆收錄今仍附之地理類焉

右地理類古蹟之屬三十七部三百七十二卷皆附存目

豫章今古記一卷

浙江范懋柱家天一閣藏本

不著撰人名氏考隋書經籍志有雷次宗豫章記一卷宋王象之輿地碑記目又云次宗作豫章古今志是編首引次宗語末云次宗於元嘉六年撰豫章記則必非雷書觀所紀至唐而止有皇唐大唐之語似爲唐人之作矣書分郡記寶瑞記寺觀

記鬼神記變化記神祠記山石記塚墓記翹俊記
等九部記載寥寥絕無體例疑依託者雜鈔成之
也

西湖繁勝錄一卷

永樂大典本

舊本題西湖老人撰不著名氏考書中所言蓋南
宋人作也宋自和議既成之後不復留意於中原
士大夫但知流連歌舞笑傲湖山故是書所述大
抵嬉遊之事以繁華靡麗相誇蓋亦耐得翁都城
紀勝之類而瑣屑又甚焉

廬陽客記一卷

浙江汪汝璫家藏本

明楊循吉撰循吉有蘇州府纂修識畧已著錄正德元年循吉同年進士西充馬金爲廬州守請循吉修郡志以議不合歸後二月因採其風土大概述爲此編凡十一目簡潔古峭頗有結構蓋借此以馳騁其筆力然漏畧太甚不足以備考證也

蜀都雜抄一卷

兩江總督孫進本

明陸深撰深有南巡目錄已著錄此乃深爲四川左布政使時所錄蜀中山川古蹟其論峨眉山當

作蛾眉又力辨禹生石紐爲元和志之誤頗爲有識其他則多隨筆劄記之文

閩部疏

無卷數 兩江總督採進本

明王世懋撰世懋有却金傳已著錄是書記閩中諸郡風土歲時及山川鳥獸草木之屬亦地志之支流蓋世懋曾官福建提學副使記其身所閱歷者也

淞故述一卷

兩淮鹽政採進本

明楊樞撰樞字運之自稱細林山人華亭人嘉靖

戊子舉人官至江西臨江府同知是書乃所述松江一郡遺聞軼事以補志乘之缺畧者松江本以吳淞江得名明初因地多水災故去水旁以禳之此書標目則猶仍其本名也書中於地理人物行誼藝能文字題咏以及詼諧瑣屑之事無不備載其藝文籍用宋孝王闢東風俗傳例載陸續渾天圖以下凡百餘種悉其鄉人著作可爲徵文考獻之資至於元楊維禎之名或從木或從示諸書參差不一樞以歲月求之謂字本從木入明後以諸

王有諱楨者始改從示其言殊臆測無據又李至剛在永樂時以善於附會深蒙傾險之譏而樞信明一統志之虛詞反目以德量寬宏惜松江舊志畧而不載亦未免涉回護鄉曲之私也

秦錄一卷

編修程晉芳家藏本

明沈思孝撰思孝字繼山嘉興人隆慶戊辰進士官至都察院右副都御史兼兵部侍郎事迹具明史本傳是書多載陝西諸郡形勝風土間引經史諸書爲証其論復河套事極以曾銑之議爲非未

免有所回護云

晉錄一卷

編修程晉
芳家藏本

明沈思孝撰所載多邊障形勝及防守扼要之處
其田賦鹽課諸條與明會典亦畧有同異至敘黃
河所經州縣及太原晉祠則大抵習見之文

長溪瑣語一卷

兩淮鹽政
採進本

明謝肇淛撰肇淛有史牘已著錄長溪今之福寧
府是書雜載山川名勝及人物故事間及神怪蓋
亦志乘之支流也

滇南雜記二卷

山東巡撫
採進本

明許伯衡撰伯衡號聽菴崑山人萬厯庚子舉人
官晉寧州知州兼攝昆陽州事伯衡嘗輯晉寧志
復雜采滇事爲此書體例與輿記畧同惟不列仕
宦人物姓名坊巷公署之類及雜事各自標目爲
小異耳大抵畧於古迹而詳於時事故下卷自丁
產以下所載公牘爲最詳自序謂於滇事無損益
而要丕爲遊談其大旨可見矣

西事珥八卷

福建巡撫
採進本

明魏濬撰濬有易義古象通已著錄是書蓋其官
粵西時所作一卷多言山川地理二卷多言風土
三卷多言時政四卷五卷多言故事及人物六卷
多言物產七卷多言仙釋神怪八卷多言制馭苗
蠻之始末雖不立地志之名然核其編次固地志
之類但不列門目耳其考訂頗不苟敘述亦爲雅
潔無說部沓雜之習然如載舒宏志轉生之類稍
涉荒唐明惠帝程濟諸事亦相沿訛謬也

泉南雜志二卷

編修程晉
芳家藏本

明陳懋仁撰懋仁字無功嘉興人官泉州府經歷
浙江通志稱其不以簿書廢鉛槧記泉南事多故
牒所未備卽是書也其所載山川古蹟禽魚花木
以及郡縣事實頗爲詳具中如淳化帖尼無著等
一兩條亦稍有考證其官山一條破閩俗葬地之
說持論亦正下卷則多記其在泉所施設皆得諸
身歷者然如泉人之宦嘉興及嘉興人之宦泉州
俱縷列姓名卽簿尉亦並載之此非天下之通例
懋仁以嘉興人而宦泉州故兩地互記耳使修地

志者人人皆援此例則罄南山之竹不足供其私
載矣凡著一書先存一厚其鄉人之心皆至薄之
見也

閩中考一卷

浙江吳玉
暉家藏本

明陳鳴鶴撰鳴鶴有東越文苑已著錄是書所考
皆福州府境山川古蹟稱得唐人閩中記於長樂
農家得宋人三山志於徐焞叅以間見訂志乘之
舛譌其考證舊事如東冶非東治泉山非泉州清
源山而越山冶山皆泉之支麓冶縣非東甌鑪峯

石在南嶼不在旗山舊志本明新志誤刪其文因
誤移其地亦頗精核惟後幅多採小說怪事及僧
家語錄未免傷於蕪雜

兩河觀風便覽四卷

江蘇巡撫
採進本

不著撰人名氏中有稱萬歷二十年者而所列宗
藩一門尙無福府則神宗中年之書也分十門一
曰圖考二曰封域三曰官秩四曰宗藩五曰賦役
雜差六曰戶口七曰河防八曰驛傳九曰儲積十
曰兵防大抵抄撮案牘爲之而於河南掌故一一

具詳較地志諸書羅列山川侈陳人物濫載藝文者較爲近實特其大者多見於史而小亦備載於通志不免爲已陳之故牘耳

增補武林舊事八卷

浙江巡撫採進本

明朱廷煥撰廷煥字中白單縣人崇禎甲戌進士官工部主事初宋末周密嘗錄南渡後百二十年典故及風俗遊宴之盛爲武林舊事廷煥於崇禎間司權杭州復採西湖志鶴林玉露容齋隨筆輟耕錄及密所著癸辛雜志諸書補綴其闕以成是

編密書十卷此增補反爲八卷者密書別有一六卷之本廷煥據以推廣也自序謂增補數十則今按所增凡睿藻恩澤開鑪故都宮殿湖產災異六門共補一百五十四則與序不符殆序文字誤耶其中湖產一門旣非宋代所獨有與斷限之例殊乖災異一門亦非土俗民風朝章國典泛濫尤甚均非密著書之本意殊屬駢枝明人點竄古書多不解前人義例動輒破壞其體裁往往似此也

帝京景物畧八卷

編修汪如藻家藏本

明劉侗于奕正同撰侗字同人麻城人崇禎甲戌進士官吳縣知縣奕正字司直宛平人是編詳載北京景物奕正摭求事迹而侗排纂成文以京師東西南北各分城內城外而西山及畿輔併載焉所列目凡一百二十有九每篇之末各繫以詩採摭頗踈王士禎池北偶談嘗譏其不考薩都拉集失載安祿山史思明所造雙塔事考據亦多不精確其爲朱彝尊目下舊聞所駁正者尤不一而足其割裂藝元二字爲塑工姓名一條殆足資笑噱

又侗本楚人多染竟陵之習其文皆么弦側調惟以纖詭相矜至如太學石鼓一條舍石鼓而頌太學殊傷冗濫又首善書院近在同時泛敘講學何關景物於體例亦頗有乖所附諸詩尤爲猥雜方今奉

命重輯日下舊聞考古證今務求傳信朱彝尊之所撰且爲太輅之椎輪侗等弔詭之詞益可爲覆瓿用矣

山左筆談一卷

編修程晉芳家藏本

舊本題明黃淳耀撰淳耀字蘊生號陶菴嘉定人
崇禎癸未進士南都破後殉節死事跡具明史儒
林傳是編所記皆山東風土形勢山川古蹟及海
運備倭諸事宜徵引拉雜殊鮮倫理案淳耀生平
未嘗遊山東所著陶菴集內亦無此書名此本見
曹溶學海類編中疑亦出偽託也

楚書

一卷

編修程晉
芳家藏本

明陶晉樸撰晉樸字若樸秀水人崇禎間嘗侍親
官楚因雜記其山水物產間及古蹟然考證殊多

疎漏如辨岫嶠碑信楊慎所錄者爲真本則其他可知矣

山東考古錄一卷

大學士英廉家藏本

舊本題

國朝顧炎武撰載吳震方說鈴中然說鈴載炎武書四種其三皆雜剽日知錄而此書之文獨日知錄所不載末題辛丑臘望日庚申是日立春字蓋作於順治十八年考王士禛居易錄記炎武嘗預修山東通志或是時所遺藁本亦未可知也

京東考古錄一卷

大學士英
廉家藏本

舊本題

國朝顧炎武撰載吳震方說鈴中其文皆見炎武所
撰日知錄及昌平山水記殆震方剽取別行僞立
此名也

誦觚一卷

兩江總督
採進本

國朝顧炎武撰時有樂安李煥章僞稱與炎武書駁
正地理十事故炎武作是書以辨之其論孟嘗君
之封於薛及臨淄之非營邱諸條皆於地理之學

有所補正

天府廣記四十四卷

編修勵守謙家藏本

國朝孫承澤撰承澤有尚書集解已著錄是書以京畿事實分類編輯凡建置府治學宮城池宮殿各一卷壇廟四卷官署二十三卷其中倉場漕務附戶部選舉貢院附禮部之類又各以所屬繫錄人物二卷名勝川渠名蹟寺廟石刻陵園各一卷賦一卷詩三卷全川志乘之體承澤所作春明夢餘錄多記明事是編則上該歷代下迄於明爲例稍

殊其中如因工部而及修築遂併淮黃形勢而詳述之則是南河而非北都因禮部而及儀注因併貴賤章服而縷載之則是會典而非地志且既以天府爲名自應以地爲限乃明建都在永樂時而內閣題名上溯洪武之初移石鼓入大都在元時而石鼓歌兼收韓愈韋應物蘇軾鳳翔所作如斯之類皆務博貪多未免失之泛濫至於六科條目自載其奏疏名蹟類中自載其別業如斯之類亦未免明人自炫之習他如人物門成德傳末附載

德殉難時與馬世奇書有在都縉紳盡如光含萬
孫北海天下事尙可爲之語含萬卽光時亨字以
給事中從賊後爲福王所誅者也以德之剛直明
決與時亨承澤決非氣類未必肯作是語如斯之
類或不免有所依托李國禎降賊拷死具載諸書
而以爲棄城遁去賊追殺之如斯之類或不免傳
聞失實前卷以翰林院爲元光祿寺後卷又以翰
林院爲元鴻臚寺如斯之類或不免小有抵牾核
其全書大抵瑕多而瑜少也

四州文獻摘抄四卷

山西巡撫採進本

國朝畢振姬撰其邑人司昌齡所摘抄也振姬字亮四高平人順治丙戌進士官至廣西按察使山西通志稱其所著有四州文獻藏於家此本有司昌齡跋曰四州文獻蓋潞澤遼沁之通考也其間有懸揣附會之說前無總序條類紛雜蓋草創未就而其徒所抄次凡二十五冊余以前人舊文各有原書又繁不能盡錄乃節其論著之要者與其所纂物產釐爲四卷題曰四州文獻摘抄據其所云

所存不及十之一尙龐雜如是則全書可想見矣

甌江逸志一卷

大學士英廉家藏本

國朝勞大輿撰大輿字宜齋石門人順治辛卯舉人官永嘉縣教諭是編前記温州舊事後記其山川物產大意欲補郡乘之闕故名曰逸志然摭拾未富且皆不著所出未爲精核至謂錢玉蓮爲倡女更齊東之語矣

粵述一卷

大學士英廉家藏本

國朝閔敘撰敘號鶴嶺歙縣人太學題名碑作江都

人疑其寄籍也順治乙未進士官至監察御史是編乃其督學廣西時所作敘述山川物產頗爲雅潔其辨狄青取崑崙關一事核以地理足訂宋史之悞惟好穿鑿字義如謂獠字當作僬卽說文之僬僬已爲無理又謂獠人住屋作兩層人居其上猪圈牛欄皆在回榻之下說文家字六下從豕可會此義云云尤爲附會儒生喜談小學動稱六書爲萬事之根本其弊往往至此也

星餘筆記一卷

山東巡撫
採進本

國朝王鉞撰鉞有粵遊日記已著錄此其世德堂遺書之第三種也皆其官西寧知縣時記其上風物產如蚰蛇拂拂諸條於舊說間有駁正所記柵字𠃉字溘字𠃉字平字有字之類亦足補桂海虞衡志所遺然大抵地志所已載也以方爲邑令故取巫馬期戴星之義名曰星餘云

中州雜俎三十五卷

河南巡撫採進本

國朝汪价撰价字介人號三儂外史自稱吳人其里居則未詳也順治己亥賈漢復爲河南巡撫修通

志价與其役踰年書成復采諸書所載軼聞瑣事
關於中州者薈萃以成是編分天地人物四函天
函子目五曰分野圖譜餘論雜識時令地函子目
十六曰建都封國紀邑紀鄉紀山紀水紀室紀園
紀寺紀塔紀觀紀廟紀墓紀碑紀橋紀俗人函子
目二十一曰帝跡聖跡賢跡官跡文跡武跡忠跡
孝跡義跡節跡隱迹流羽流緇流術流技流女史老
史兒史凶史異史人雜物函子目十四曰禽志獸
志鱗志蟲志草譜木譜花譜穀品果品菜品飲案

食案器考物考采撫繁富用力頗勤而多取稗官
家言純爲小說之體又事皆不著所出人亦往往
不著時代編次繁複漫無體例可謂勞而鮮功者
矣

湖瑞雜記一卷

大學士英廉家藏本

國朝陸次雲撰次雲字雲士錢塘人康熙初山拔貢
生官江陰縣知縣是書蓋續田藝蘅西湖志餘而
作如慶忌塔夾城之類亦頗有考辨而近於小說
者十之七八蓋藝蘅之書體例亦如是也

姑孰備考八卷

安徽巡撫
採進本

國朝夏之符撰之符字珪伯當塗人順治中修太平府志未成乃刪其八志二表而爲此書首郡紀三卷以擬本紀次人物傳贊二卷以擬列傳次鄉音集三卷皆之符自作之詩非志非集殊乖體例又人物傳中列韋弦佩於先賢而弦佩方序其書則其人未死亦豈蓋棺論定之義乎弦佩原序稱是書十二卷張總序又作九卷互相矛盾惟陶元胤序作八卷與此本相合云

三十一 地理類有長六

臺灣記畧一卷

大學士英廉家藏本

國朝李麟光撰麟光號蓉洲武進人是編雜記臺灣山川附以暹羅別記一篇篇帙寥寥疑為刪削不完之本也

海表奇觀八卷

浙江汪啟淑家藏本

不著撰人名氏凡標二十三門曰溯源曰疆境曰形勢曰分野曰氣候曰潮汐曰節序曰風俗曰黎俗曰占厯曰災祥曰名山曰水泉曰名宦曰人物曰列傳曰祠廟曰古蹟曰墳墓曰物產曰奇人曰

奇事曰題咏蓋卽抄撮瓊州府志而每條附以論
贊詩句據其自序稱戊申官於瓊州又言家於齊
魯考瓊州府志康熙七年戊申知府牛天宿山東
人當卽此人也

江南星野辨一卷

兩江總督
採進本

國朝葉燮撰燮字星期吳江人康熙庚戌進士官寶
應縣知縣其書厯引周禮爾雅及星經史志所載
揚州吳越分野獨推劉基清類天文分野之書爲
得郡邑分度之詳案星土之說雖本周禮保章氏

亦見於左傳諸占然先儒已不得其傳解多附會術家用以推驗偶應者十不得一不應者十恆逾九况疆域既已非古而猶執二十八宿尺尺寸寸而拓之其乖迕殆不待辨輿圖所列大抵具文博引繁稱徒爲枝贅而已

嶺南雜記二卷

大學士英廉家藏本

國朝吳震方撰震方有讀書正音已著錄是編記其客遊廣東時所見上卷多記山川風土兼及時事所載番禺唐化鵬夫務條議花田立縣議廣西巡

撫彭鵬禁官販私鹽示諸條亦頗留心於利弊下
卷則記物產而已書中稱平南王尚可喜爲逆藩
伏讀

五朝國史列傳可喜之子尙之孝反覆悖亂終於伏誅謂
之逆藩可也可喜則終守臣節未可目之以逆是
亦傳聞之未審矣

臺灣隨筆一卷

編修程晉芳家藏本

國朝徐懷祖撰懷祖字燕公松江人自序稱乙亥之
春再至閩漳復有臺灣之行蓋康熙三十四年所

作其記臺灣風土及自閩赴海水程俱不甚詳備
但就其所歷言之耳

燕臺筆錄一卷

編修程晉
芳家藏本

此本載曹溶學海類編中題

國朝項惟貞撰惟貞字端伯秀水人朱彝尊之門人
也然檢核其文實卽朱彝尊日下舊聞內風俗一
門疑彝尊嘗屬之袁輯偶存殘稿作僞者遂別標
此名也且彝尊撰日下舊聞時溶歿已久又安得
而錄之學海類編多書賈所竄入非溶原本此亦

一証矣

神州古史考一卷方輿通俗文一卷

安徽巡撫
採進本

國朝倪璠撰璠字魯玉錢塘人康熙乙酉舉人官內閣中書舍人是書自序云按今之版圖取自漢迄唐諸史地志列於郡縣之首上搜舊聞旁摭遺逸凡兩京十四省共一百五十餘卷謂之神州古史考又取唐以後者別爲一編名曰方輿通俗文然所梓者惟杭州一府九縣而已蓋未成之書也

案此書據其原序宜入總志然所刻者惟一

府入之總志爲不倫而又不可列於郡縣之中故附存其目於雜記此無類可歸之變例也

西粵對問

無卷數 江蘇 巡撫採進本

國朝江德中撰德中字漢石徽州人官至廣西布政司叅議是書記西粵山川風土物產頗資異聞然其徵據踈謬亦復不少如引左傳有仍氏生女黝事不檢杜注美髮爲黝之語而誤以爲肌膚之黑又云雉黑色者爲鷓雉按爾雅秩秩海雉注如雉

而黑在海中不云名鷗也殆緣海字而誤歟

潯陽蹠醢六卷

江西巡撫採進本

國朝文行遠撰行遠字樵菴江西德化人康熙中貢生是書專志九江一郡故實首有凡例自謂讀書時遇郡事隨見隨錄自經史子集及稗官野乘小說之類靡所不採首卷分象緯地輿書院祠廟宮室邱墓服食器用玩好草木鳥獸蟲魚十二目次卷分仕宦吏治典禮經費兵防盜賊六目三卷分交遊器局方技孝義閭閻忠節流寓人物栖逸九

目四卷分真仙僧寶二目五卷分詩文書畫典籍
名勝四目六卷分像教禪喜靈異感應果報鬼神
六目其摭拾頗爲繁富而分別門類殊多失當如
既有僧寶又有禪喜既有鬼神又有果報感應靈
異之類中所採取亦未見決擇蓋有意求多未免
失之龐雜也

蜀都碎事六卷

兩淮馬裕
家藏本

國朝陳祥裔撰祥裔本姓喬氏號藕漁順天人康熙
中官成都府督捕通判採蜀中故實爲碎事四卷

雜引諸書或注或否間附以考証案語及前代題
咏詩文復以所采未盡別爲藝文二卷謂之補遺
祥裔所自作詩亦併列於唐宋名作之間

續閩小紀一卷

江蘇巡撫
採進本

國朝黎定國撰定國字于一江都人嘗客遊福建學
使幕中因據所見聞輯爲此書以舊書先有閩小
紀故以續爲名凡七十六條所載閩地風俗土產
及瑣碎故實大約通志所已具別無創聞也

嶺海見聞四卷

兩淮馬裕
家藏本

國朝錢以塏撰以塏遊宦廣東前後八載所作羅浮外史已著錄此編又其雜錄見聞之書也大致欲倣水經注洛陽伽藍記而才不逮古又採錄冗雜無所限斷記陸賈使粵乃泛及作新語事記南漢事甚畧乃闕載劉鋹入宋後事皆與嶺海無關其他雜錄小說不核真僞如述異記開元天寶遺事之類與聞見亦無涉至於荔枝銅鼓前後各出二條尤無體例矣

南漳子二卷

浙江巡撫採進本

國朝孫之騷撰之騷所輯尚書大傳已著錄之騷居
於河渚近南漳湖因以自號是書所紀皆其一鄉
之故實乃自稱爲子核其體例實亦於古無徵

右地理類雜記之屬四十二部一百七十六卷

內二部無

卷數皆附存目

欽定四庫全書總目卷七十八

史部三十四

地理類存目七

古今遊名山記十七卷

安徽巡撫
採進本

明何鏜撰鏜有括蒼彙記已著錄是書採史志文

集所載遊覽之文以類編輯首爲總錄三篇曰勝

記曰名言曰類考次記兩京各省山川及古今遊

人序記

天下名山諸勝一覽記十六卷

兩江總督
採進本

明慎蒙撰蒙字山泉歸安人嘉靖癸丑進士官至
監察御史是書以何鏜所作古今遊名山記重複
太甚因刪汰繁冗而增入通志及別集所載記文
凡十之四視鏜書頗爲簡明然文有加減而事不
增損仍無資於攷據其記文之末各加評語亦不
出坊刻積習自序稱其書名天下名山諸勝一覽
記而第一卷首又題作游名山一覽記第二卷以
後則題作名山巖洞泉石古蹟殊不畫一蓋明代
文士往往急行其書陸續付梓至書成後始有定

名而已刊者遂不復追改故名目往往錯互不獨
此書爲然也

名山游記一卷

兩淮鹽政
採進本

明王世懋撰世懋有却金傳已著錄是編一曰京
口游山記分上下二篇一曰游匡廬山記一曰東
游記一曰游二泉記一曰游鼓山記一曰游石竹
山記一曰游九鯉湖記而附以游溧陽彭氏園記
末有世懋跋一篇蓋爲鼓山以下三記作後合刻
諸記仍以綴於末也

名山注

無卷數
內府藏本

明潘之恒撰之恒有黃海已著錄是編首江上山
志次蜀山志次淮上雜志次新安山水志次越中
山水志次三吳雜志或載前人行紀志傳題詠或
自爲序記其他各勝漏畧尚多疑就其所遊歷者
述之其書不分卷帙前後亦無序跋而名山注三
字僅題於簽似非完本也

五嶽游草十二卷

兩江總督
採進本

明王士性撰士性字恒叔臨海人萬曆丁丑進士

官至南京鴻臚寺卿事跡附見明史王宗沐傳錢
希言猶園又稱臨海王中丞士性未之詳也士性
初令確山遊嵩嶽擢禮科給事中遊岱嶽華嶽恒
嶽及叅粵藩遊衡嶽此外遊名山以十數經歷者
十州遊必有圖有詩爲圖若記七卷詩三卷不盡
於記與詩者爲雜志二卷亦名廣遊記統題曰五
嶽遊草蓋舉其大以該其餘也猶園稱峨嵋山有
老僧性好遊自恨一生不得徧探名嶽年又駸駸
向暮乃誓於來生了此夙願臨化謂其徒曰吾今

往台州臨海縣王氏託生爲男計老僧化去之年
月日時卽士性之甲子云云殆因有此書而附會
之然亦緣士性癖嗜山水故有是言矣

廣志繹五卷雜志一卷

編修汪如藻家藏本

明王士性撰此書又於五嶽游草廣游紀以外追
繹舊聞以補未及者也首爲方輿崖畧次兩都次
諸省附以雜志其四夷輯一種列目於雜志之前
然有錄無書註曰考訂嗣出蓋未刊也凡山川險
易民風物產之類巨細兼載亦間附以論斷蓋隨

手記錄以資談助故其體全類說部未可盡據爲

考證也

黔志一卷

編修程晉
芳家藏本

明王士性撰曹溶收入學海類編中核其所載卽

士性游記中之一篇書賈摘出別立此名耳

豫志一卷

編修程晉
芳家藏本

明王士性撰亦其五嶽游草之一篇曹溶摘入學

海類編者也

日畿訪勝錄二卷

編修程晉
芳家藏本

明姚士粦撰士粦所輯陸氏易解已著錄此錄乃萬曆甲午士粦遊京師時尋訪都城內外諸勝因彙輯成編然所載古蹟實皆抄撮孫國救燕都游覽志蔣一葵長安客話諸書別無異聞不足資証據也

天目遊記一卷

兩江總督
採進本

明黃汝亨撰汝亨有古奏議已著錄是記乃汝亨與佛慧寺僧同遊天目山而作叙是山景物頗詳然記中叙月叙日而不叙爲何年亦行文之偶疎

也

紀遊稿一卷

兩淮鹽政
採進本

明王衡撰衡字緱山太倉人萬曆辛丑進士官翰
林院編修事跡附見明史王錫爵傳是編乃所作
游記凡泰山一首香山三首盤山一首馬鞍潭柘
一首雜記三首蓋隨時撫拾付梓者前有陳繼儒

序詞亦佻巧

循滄集二卷

兩江總督
採進本

明姚希孟撰希孟字孟長長洲人萬曆己未進士

官至詹事府詹事事迹具明史本傳是編乃所作
游記以循滄名篇蓋用宋袁粲語也上卷十三篇
皆游太湖洞庭所作下卷十五篇則平生所作南
北游記皆在焉末爲跋王文恪洞庭游記二篇及
跋徐宏祖鹿門鴻寶冊一篇宏祖亦好游故以類
附游記後焉其文體全沿公安竟陵之習務以纖
佻爲工甚至游廣陵記於全篇散語之中忽作儷
偶一聯云洞天深處別開翡翠之巢笑語微聞更
掣鴛鴦之鎖自古以來有如是之文格乎

山行雜記一卷

浙江鮑士
恭家藏本

明宋彥撰彥華亭人與趙宦光同時嘗至京師歷
遊玉泉香山因紀其園亭刹寺巖壑之勝蓋亦學
遊城南記諸書而作然考据多疎如中稱玉泉道
上有壯節祠碑稱崇安侯譚公而無其名疑爲靖
難武臣戰死者按崇安侯譚淵從成祖起兵於夾
河戰没子孫得世襲侯爵當時如鄭曉王世貞所
著書內皆詳載其事而彥不能知亦殊昧於典故
矣

名山記四十八卷圖一卷附錄一卷

浙江巡撫
採進本

不著撰人名氏蓋因何鏗之書而增葺之凡北直

隸二卷南直隸十卷浙江十卷江西四卷湖廣四

卷河南三卷山東二卷山西一卷陝西一卷福建

二卷廣東二卷廣西一卷四川二卷雲南一卷貴

州一卷前爲圖一卷畧繪名勝之跡未爲附錄一

卷則荒怪之說神異經十洲記之類也所錄古人

遊記十之三名人遊記十之七采摭頗富而龐雜

特甚如酈道元水經注徐兢高麗圖經周敦頤六

朝事迹之類皆割裂鉅釘改易名目至於孔稚圭
北山移文駱賓王冒雨尋菊序宗懔荆楚歲時記
周密武林舊事楊銜之洛陽伽藍記王觀揚州芍
藥譜張鉉梅品王世貞題洛中九老圖之類闌入
者不可殫述不知其與名山河與其圖首有篆字
題識曰崇禎六年春月墨繪齋新摹則出自坊賈
之手可知胡維霖墨池浪語乃云名山記乃何濱
巖所集近復補入景必窮幽語必造奇仁智者豈
能足跡徧天下得此可以卧遊所謂補入蓋卽此

本殆維霖未細閱其書歟

廣州遊覽小志一卷

山東巡撫
採進本

國朝王士禎撰士禎有古懽錄已著錄士禎以康熙

甲子十一月祭告南海以乙丑二月八日至四月

一日歸計留廣州五十一日因而遊覽古跡作爲

此志凡光孝寺六榕寺五羊觀海幢寺海珠寺越

秀山蒲澗寺長壽菴南園三忠祠九處皆會城內

外地也

天下名山記鈔

無卷數
內府藏本

國朝吳秋士編秋士字西湄歙縣人其書取何鏗遊
名山記及王世貞之廣編刪而錄之無一字之考
訂

泰山紀勝一卷

山東巡撫
採進本

國朝孔貞瑄撰貞瑄有大成樂律已著錄是編乃其
初官泰安教諭時紀所遊歷而作也大畧仿岱史
之舊自萬仙樓以下共五十餘則每景各序其勝
其餘諸山脉絡與岱宗相屬者如尼山防山龜蒙
鳧嶧之類亦咸入紀載其捨身崖社首蒿里封禪

數條持論頗不詭於正然於封禪舊典引據未能
詳洽大抵議論多而考據少其文格亦尚沿竟陵

末派云

匡廬紀遊一卷

大學士英廉購進本

國朝吳闡思撰闡思字道賢武進人所記廬山名蹟
凡五十八條詞頗簡潔然大抵以摹寫景物爲長

滇黔紀遊二卷

大學士英廉購進本

國朝陳鼎撰鼎有東林列傳已著錄是編爲其客遊
滇黔時所紀上卷紀黔下卷紀滇於山川佳勝叙

述頗爲有致而不免偶出鄙語如紀貴州諸苗曰
男子之麗者卽古之潘安宋朝有不及焉女子之
麗者漢之飛燕唐之太真亦無能出其上矣此種
女子欲購之者牛馬當以千計男子皆不樂爲龍
陽君有犯之者輒自殺又記楚雄姚安開化三郡
曰余徧遊三郡別時各有遺贈土儀之盛餽贖之
豐有多至百金者云云其言殊陋又如記三塔寺
黃華老人石刻一事黃華老人卽金王庭筠所作
四詩刻石在山西汾州故有人道高歡避暑宮句

後李中陽始摹刻於點蒼山王士禎居易錄載之甚詳鼎乃以爲仙人之筆則考証之疎亦可概見矣

王山遺響六卷

江西巡撫採進本

國朝張貞生撰貞生號箕山廬陵人順治戊戌進士官至翰林院侍讀學士王山在泰和仁善鄉初名義士又改匡山土人稱子瑤山貞生嘗游息其中是編首載所作詩次載所題對聯次載所作記次爲茅屋隨劄則山中之日記次爲他人所作詩賦

傳記前有羅麗序謂貞生所著文集尚未刊行此
其家居一載之內流連山水隨筆記之以示其意
之所寓者所錄雖皆詩文而其體例在游記地志
之間故附之地理類焉

蒼洱小記一卷

兵部侍郎紀昀家藏本

國朝畢曰濬撰曰濬有滇遊記已著錄是編亦曰濬
父忠告官雲南布政司參議時曰濬省覲至大理
紀其山川名勝而作相傳靈鷲山卽今點蒼山爲
釋伽佛修道處賓川之雞足山卽伽葉道場故曰

滯是書多引佛經爲證據

右地理類游記之屬二十一部一百二十三卷

內二部無

卷數皆附存目

南中志一卷

浙江范懋柱家天一閣藏本

舊本題曰晉常璩撰前有顧應祥序云此書附在

華陽國志近世無傳升菴楊太史謫居於滇以其

舊所藏本手錄見示云云考隋以來經籍藝文諸

志皆無此書宋李至校正華陽國志原序具存亦

不云附有此卷且漢王恢攻南越在建元六年張

騫使大夏在元狩元年此云騫以白帝東越攻南
越大行王恢救之年月之先後既殊事蹟亦不知
何據又晉泰始七年分益州置寧州而此云六年
牂牁郡下元鼎六年亦誤作元鼎二年牴牾不一
楊慎好撰僞書此書當亦漢雜事秘辛之類也

高麗記

無卷數 浙江范懋
柱家天一閣藏本

舊本題宋徐兢撰案兢別有高麗圖經四十卷已
著於錄此本所載即從圖經中摘鈔而成非兩書
也

記古滇說一卷

浙江巡撫
採進本

舊本題宋張道宗撰前有嘉靖己酉沐朝弼序則稱道宗爲元人卷末題咸淳元年春正月八日滇民張道宗錄而書中又載元統二年立段信苗實爲大理宣慰使司事顛倒牴牾粹不可詰其書大抵陰剽諸史西南夷傳而小變其文惟所記金馬碧雞事稱阿育王有三子爭逐一金馬季子名至德逐至滇池東山獲之卽名其山曰金馬長子名福邦續至滇池之西山忽見碧鳳卽名其山曰碧

雞所謂金馬碧雞之神卽是二子其說荒誕與史傳尤異文句亦多不雅馴殆出贗託况書中明言宋興以北有大敵不暇遠畧使傳往來不通中國何以度宗式微之時轉奉其正朔然則非惟道宗時代恍惚難憑卽其人之有無且不可遽信矣卷首有楊慎點校字其卽慎所依托而故謬其文以疑後人歟

異域志一卷

浙江范懋柱家天一閣藏本

不著撰人名氏篇首胡惟庸序曰羸蟲錄者予自

吳元年丁未出鎮江陵有處士周致中者前元之
知院也持是錄獻於軍門則此書初名羸蟲錄爲
周致中所作又開濟跋曰是書吾兄得之於青宮
乃國初之故物今吾兄重編更其名曰異域志則
此書名異域志乃開濟之兄所更定然考明太祖
於元至正二十四年甲辰建國號曰吳丁未當稱
吳三年不得稱元年又濟跋題壬午長至爲惠帝
建文四年其時濟被誅已久不應作跋疑皆出於
依託也其書中雜論諸國風俗物產土地語甚簡

畧頗與金銑所刻異域圖志相似無足采錄

異域圖志一卷

浙江范懋柱家天一閣藏本

不著撰人名氏後有明廣信府知府金銑序謂宋亦有應天府疑是宋書然書中載明初封元梁王子於耽羅則爲明人所作無疑其書摭拾諸史及諸小說而成頗多疎舛如占城役屬於安南乃云

安南爲占城役屬殊不足據其他敘述亦太寥寥

百夷傳一卷

浙江范懋柱家天一閣藏本

明錢古訓撰古訓餘姚人洪武甲戌進士官至湖

廣布政司叅政百夷卽麓川平緬宣慰司

案百夷卽今羅

夷譯語對音故無定字

洪武二十九年其酋思倫發訴與緬

人構兵古訓時爲行人與其同官桂陽李思聰奉

詔往諭倫發等聽命而還因述其山川人物風俗

道路爲書以進古訓旋以勞擢湖廣叅政請澤州

楊砥序之黃虞稷千頃堂書目以此書爲李思聰

作今據砥序及夏原吉後序知實古訓所作虞稷

偶失考也

南夷書一卷

浙江范懋柱家天一閣藏本

明張洪撰洪字宗海常熟人洪熙初召入翰林官
修撰是編乃永樂四年緬甸宣慰使那羅塔判殺
孟養宣慰使刁查及思樂發而據其地洪時爲行
人齋勅往諭因採摭見聞記其梗概所載洪武初
至永樂四年平定雲南各土司事皆畧而不詳其
於雲南郡建置始末亦未能明析如南詔爲蒙氏
改鄯闡府厯鄭趙楊三姓始至大理段氏孟養麓
川各有土司書中皆遺之唯載梁王拒守及楊苴
乘隙竊發諸事稍足與史參考耳書中瀾滄江作

蘭滄江思樂發作思鸞發與史互異蓋亦譯語對音之故也

西洋番國志

無卷數 浙江巡撫採進本

明鞏珍撰珍應天人其仕履始末未詳永樂中勅遣太監鄭和等出使西洋宣宗嗣位復命和及王景宏等往海外徧諭諸番時珍從事總制之幕往還三年所歷諸番曰占城曰瓜哇曰暹羅曰舊港曰啞魯曰滿刺加曰蘇門答刺曰那姑兒曰黎代曰喃勃里曰溜山曰榜葛刺曰錫蘭山曰小葛蘭

曰柯枝曰古里曰祖法兒曰忽魯謨斯曰阿丹曰
天方凡二十國於其風土人物詢諸通事轉譯漢
語觀縷畢記至宣德九年編成所記與明史外國
傳大概相同疑史採用此書也

瀛涯勝覽一卷

兩江總督
採進本

明馬觀撰觀不知何許人書中多記鄭和出使時
事則作於永樂以後也所記海外諸番曰占城曰
瓜哇曰舊港國曰暹羅曰滿刺加曰啞魯國曰蘇
門答刺曰那孤兒曰黎代曰喃勃里曰錫蘭曰小

葛蘭曰阿枝曰古俚曰溜山曰祖法兒曰阿丹國
曰榜葛刺國曰忽魯謨斯國凡十九國而爲篇十
八其那孤兒國附見蘇門答刺後以其微也各載
其疆域道里風俗物產亦畧及沿革大抵與史傳
相出入

朝鮮雜志一卷

浙江范懋柱家
天一閣藏本

舊本題明董越撰越有朝鮮賦已著錄是書繁碎
無體例以越所撰朝鮮賦校之皆賦中越所自註
蓋好事者抄出別行僞立名目非越又有此書也

海槎餘錄一卷

江蘇周厚
靖家藏本

明顧訢撰訢字滙堂吳縣人官至南安府知府是編乃其官儋州時所著凡風土物產悉隨筆記之共四十餘則皆地志所已具惟處置叛黎一節敘述頗詳爲蠻司各志所未及云

日本考畧一卷

浙江范懋柱家
天一閣藏本

明薛俊撰俊定海人嘉靖二年日本國使宗設來貢抵寧波未幾宋素卿等亦至互爭真偽自相殘殺所過州縣大肆焚掠浙江瀕海之地人民苦之

俊因纂輯是書大畧言防禦之事爲多而國土風俗亦類入焉然見聞未廣所輯沿革疆域二畧約舉梗概挂漏頗多屬國中兼及新羅百濟等國不知新羅百濟在宋時已爲朝鮮所并其時並無是國矣又序世系但及宋雍熙以前而不載元以後國王名號亦疎漏也

日本圖纂一卷

浙江范懋柱家天一閣藏本

明鄭若曾撰若曾有鄭開陽雜著已著錄此書乃其在胡宗憲幕府所作以坊行日本考畧一書舛

訛難據因從奉化人購得南嶼倭商秘圖持以詢
諸使臣降倭通事火長之屬彙訂成編前爲圖三
幅附以論說後載州郡土貢道路形勢語言什器
寇術而儀制詩表別爲附錄視若曾萬里海防編
內所載較爲詳密其針經圖說止載入貢故道而
間道便利皆隱而不言蓋恐海濱竊宄得通倭之
路有深意存焉惟其言明太祖洪武二年命趙秩
往諭其國明史載在洪武三年又言太宗十九年
寇遼東總兵劉江殲之於望海埚明史載在永樂

十七年乃都督劉榮非總兵劉江均不相合然明
史據明實錄及國史不得有誤殆是書傳聞未實
也

朝鮮圖說一卷

浙江范懋柱家
天一閣藏本

明鄭若曾撰先圖後考次詳其世紀都邑山川風
俗土產道里貢式而以宋鄭興裔奏議一篇附焉
蓋是時朝鮮亦被倭患故因日本而及之

琉球圖說一卷

浙江范懋柱家
天一閣藏本

明鄭若曾撰體例與朝鮮圖說相同地里則但標

其針路末附宋鄭藻紀事一篇琉球奉明正朔從無寇掠殆以其國外偏於倭內密邇於福建而爲預防之計歟

安南圖說一卷

浙江范懋柱家天一閣藏本

明鄭若曾撰體例亦與朝鮮圖說同但增疆域偽制二門疆域寥寥數語其偽制則紀黎莫二姓事也未附宋鄭竦紀畧一篇若曾時距莫登庸事未遠故籌畫邊防併及安南然相距旣遙所傳聞者畧矣

西洋朝貢典錄三卷

江蘇巡撫探進本

明黃省曾撰省曾字勉之吳縣人嘉靖辛卯舉人
明史文苑傳附見文徵明傳中是編紀西洋諸國
朝貢之事自占城以迄天方爲國二十有三國各
一篇篇各有論凡道里遠近風俗美惡物產器用
之殊言語衣服之異靡不詳載攷明史外國傳其
時通職貢者尚不盡於此錄省曾止就內侍鄭和
所歷之國編次成書餘固未暇及也未有二跋一
爲東山居士孫允伽一爲清常道人趙進美允伽

稱此書初未付梓得其手稿錄之進美謂其章法
句法頗學山海經信爲奇書錢曾讀書敏求記亦
載之然其精華已採入正史餘亦無他異聞也

夷俗記一卷

浙江鮑士
恭家藏本

明蕭大亨撰大亨號岳峯泰安人嘉靖壬戌進士
官至兵部尚書是書專紀韃靼風俗分匹配生育
分家治姦治盜聽訟葬埋崇佛待賓尊師耕獵食
用帽衣敬上禁忌牧養習尚教戰戰陣貢市二十
類蓋大亨嘗爲宣大總督故記錄其所聞然殊多

失實不足徵信惟順義王互市之地明史載大同於左衛北威遠堡邊外宣府於萬全右衛張家口邊外山西於水泉營而此書載大同互市有三堡一曰守口堡二曰得勝堡三曰新平堡則大亨所親見較史爲詳云

朝鮮國志一卷

浙江范懋柱家天一閣藏本

不著撰人名氏所存惟京都風俗山川古都古迹五門中稱我康獻王知爲朝鮮人作引明一統志稱大明知爲作於明時又多稱王氏諸王爲高麗

王知爲明之中葉李氏有國改稱朝鮮之後也

東南夷圖說二卷嶺海異聞一卷續聞一卷

浙江吳玉
墀家藏本

明蔡汝賢撰汝賢字思齊華亭人隆慶戊辰進士
是編成於萬厯丙戌所紀皆東南海中諸國殊多
傳聞失實如謂琉球國人盲目深鼻男去鬚輯
鳥羽爲冠裝以珠玉赤毛今琉球貢使旅來目所
共睹殊不如其所說海西諸國統稱西洋汝賢乃
以西洋爲國名則更謬矣至於異聞續聞尤多荒
誕不經其圖像悉以意杜撰亦毫無所據

四川土夷考四卷

浙江汪汝璩家藏本

明譚希思撰希思有明大政纂要已著錄是書乃希思在蜀時命布政使官屬取全蜀土司土府繪圖立說裒爲一編刻於萬曆二十六年首全圖次各土司土府分圖圖各有說凡七十八篇其中所列多沿邊城堡守禦名目而於土司境壤山川形勢概未之及蓋專爲防守之策而設雖名爲土夷考其實乃險隘圖也所附之說僅據州縣申冊簡畧頗甚亦不足以備考核

日本考五卷

浙江鮑士
恭家藏本

明李言恭都杰同撰言恭字惟寅岐陽武靖王文
忠之裔以萬曆二年襲封臨淮侯杰字彥輔蔚州
人嘉靖丙辰進士官至南京兵部尚書方言恭督
京營叅政時杰爲右都御史會倭患方劇乃其據
所聞爲此書記其山川地理及世次土風而於字
書譯語臚載尤詳後倭陷朝鮮封貢議起杰以力
爭不合徙南京而言恭子宗城卒爲石星所薦充
正使往封至釜山而倭情中變易服逃歸被劾論

成蓋徒恃紙上空言宜其不能悉知情僞也

咸賓錄八卷

浙江鮑士恭家藏本

明羅曰褫撰曰褫字尚之江西人是編刊於萬曆中分列諸國之事以東西南北爲分欲誇明代聲教之遠故曰咸賓其實多非朝貢之國又敘事古今糅雜標題人地混淆亦頗無體例

別本坤輿外紀一卷

大學士英廉購進本

舊本題

國朝南懷仁撰載吳震方說鈴前集中案懷仁坤輿

外紀別有全本已著於錄此本摘錄其文併刪其
圖說乃叢書之節本猶明季坊刻竄亂古書之陋
習也

西方要記一卷

編修程晉
芳家藏本

國朝西洋人利類思安文思南懷仁等撰利類思安
文思皆以明末入中國南懷仁以順治十六年至
京師此書則康熙初年所述凡二十條專記西洋
國土人物土產及海程遠近大抵意在夸大其教
故語多粉飾失實

洱海叢談一卷

浙江巡撫採進本

國朝釋同揆撰同揆字輪庵雲南大理府文殊寺僧也是書紀滇南未入版圖之初引隋書西海阿育國王仲子封蒼洱之間爲南詔之始祖其後世滅而復興者有段氏蒙氏高氏相承至明初始皆內附所載觀音大士結茅郡中及唐永徽後現身七化之語皆近荒誕以緇徒爲地志自張其教固所不免耳

八紘譯史四卷紀餘四卷

江蘇巡撫採進本

國朝陸次雲撰次雲有湖壩雜記已著錄是書專錄
荒外諸國古事皆採摭史傳複見不鮮近事多據
瀛涯勝覽職方外紀諸書亦多傳聞失實所記西
域山川物產其地自

天威者定俱入版圖如謂高昌盛暑人皆穴處鳥飛或
爲日氣所爍而墮謂火焰山烟焰燭天謂火蠶綿
絮衣一襲止用一兩稍多熱不可耐謂白疊子其
實成繭中有細絲謂哈密四味木其實如棗以竹
刀取之則甘鐵刀取之則苦木刀取之則酸蘆刀

取之則辛謂龜茲有山出泉行數里入地狀如醜
翻甚臭人服之齒落更生今由嘉峪關南路至喀
什噶爾卽經三國故地安得有此事哉卽其他可
知矣後附譯史紀餘四卷一爲東海西海及異物
二爲高麗日本占城安南琉球之詩三爲外國錢
文四爲西番百譯緬甸暹羅四國之書亦皆耳剽
之談不爲確據如人面魚食目一條此書作前朝
使臣至日本事尙谿織志又以爲前人進於初官
是土者一人之書而自相矛盾是尚可爲信史哉

八紘荒史一卷

江蘇巡撫
採進本

國朝陸次雲撰次雲旣撰八紘譯史記其曾通中國者因復摭小說稗官所載荒渺之說爲此書皆無稽之談也書首題卷之一則當不止此卷而次雲所刻雜著前列總目此書實止一卷豈欲續輯而未成歟

尚谿織志三卷志餘一卷

大學士英
廉家藏本

國朝陸次雲撰所記皆諸苗蠻種落風俗前有題詞稱諸書所載同異攸殊余徵諸見聞詳爲考正措

詞雖簡微事彌該上卷爲崙谿羣言考正中卷爲蠻獠志下卷爲滇中崙谿所產志餘一卷則皆蠻中歌謠自吳淇粵風續九採山者也

安南紀遊一卷

大學士英廉家藏本

國朝潘鼎珪撰鼎珪字子登晉江人是編成於康熙二十七年乃鼎珪遊廣東時偶附海舶遇風飄至其國因紀其山川風土之大畧與諸書所記不甚相遠無他異聞

海外紀事六卷

浙江巡撫採進本

國朝釋大汕撰大汕廣東長壽寺僧康熙乙亥春大越國王阮福週聘往說法越歲而歸因記其國之風土以及大洋往來所見聞大越國者其先世乃安南贅婿分藩割據遂稱大越卷前有阮福週序題丙子蒲月蓋康熙三十五年也

連陽八排風土記八卷

浙江巡撫採進本

國朝李來章撰來章號禮山本名灼然以字行襄城人康熙乙卯舉人官連山縣知縣是書卽其康熙戊子在連山時所作八排者獠獠所居以竹木爲

柴柵謂之排也凡分圖繪形勢風俗言語勦撫建置約束向化八門門爲一卷其目尚有第九卷題曰雜述上下然有錄無書豈爲之而未成歟中多自敘政績其向化一門紀所判斷之案各爲標目殆似傳奇尤非體例

中山傳信錄六卷

兩淮馬裕家藏本

國朝徐葆光撰葆光字澄齋吳江人康熙壬辰進士官翰林院編修康熙五十七年

冊封琉球國世子尚貞爲國王以葆光爲副使歸時奏上

是書繪圖列說紀述頗詳

楚南苗志六卷

湖北巡撫
探進本

國朝段汝霖撰汝霖字時齋號梅亭漢陽人由舉人
歷官建寧府知府是書乃汝霖爲湖南永綏同知
時所作前五卷皆載苗人種類風俗物產言語衣
服及歷朝控禦撫治之法末一卷附載瑤人土人
及粵西六寨蠻而六寨蠻尤爲簡畧以非楚所治
故也體例冗雜敘述亦不甚雅馴而得諸見聞事
皆質實惟前載星野與苗蠻土人皆無所涉未免

沿地志之陋格耳

右地理類外紀之屬二十四部八十二卷

內二部皆無卷數

附存目

